

## Mark Riwana Aiaina, Mark i girugirumia

### *Pariverena*

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana eġa ita riweta. Wate tauviararamana e ririwa da Mark i girumi. Mark, lamna eġa Apasol, wate tauviararamana maġamaġau i notai da tauna, Peter maiteni au Rome i mae. Ma Peter, Iesu ana kua ma ana viararamana maġamaġau Mark i riwei. Anina ma Mark wei riwana i girumi da tauvitumaġana au Rome ita aramanei, Iesu aiwai i kauai.

Riwa karena i girugirumia e vivieġeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kua maġamaġau ita kauai. Wei kauai tana inainai maranai: e viviararamana; ma arua-apoapoei e viviaġaġana-opunei; ma rava doridoriai e vivilawani; ma ġo'apoapoe e notanota tawanei. Mark, Iesu ana nola ma ana kua i girumi ma eġa ana viararamana ita girumaguratei. Mark i vieġeta menanare Iesu au korosi i'raġe da rava anatapai ita vilawanai ma God menanare, Iesu iraġalei i vovaimairini.

*John Taubabataito, Iesu ana aninae  
i vovokaukauai*

*(Matthew 3:1-12; Luke 3:1-18; John 1:19-28)*

<sup>1</sup> Wei lamna Iesu Keriso Messiah God natuna Riwana Aiaina karena.

<sup>2</sup> Wariāga peroveta Isaiah i girugirumia nanare:  
 “Ona rautaniḡana! Au peroveta au naom  
 ana paritawanei  
 da am aninae ina vokaukauei.” (Malakai 3:1)

<sup>3</sup> ☆ “Peroveta au mutulua e viviḡoreḡore:  
 ‘Taumi BADA ana aninae ona vokaukauei,  
 ana eta ona vovai-jijimani!’ (Isaiah 40:3)

<sup>4</sup> Ma taupariverena John i nei au mutulua da rava i babataitōi ma God riwana i jimejime i pa, “Ami ḡo’apoapoe ona voterei, ma ona mae-taviremi God awarina ma ami ḡo’apoapoe ina nota-tawanei ma ana babataitoimi.”

<sup>5</sup> Ma rava anatapui Judea au paratana ma au Jerusalem i nae da John ita rautaniḡanei. Maranai ai ḡo’apoapoe i rupeni, John, tauri i babataitōi au waira Jordan.

<sup>6</sup> Ma John, *kamel* aparana metametanana i oteoteni ma ana tairoro ḡamoḡamo opina. Ana lam kapau ma manigewa.

<sup>7</sup> Ma tauna, rava i ririwei i pa, “Rava au muriu e nenei i ḡetelara, eḡa me tau. Eḡa tagotagogiu da ana ae uma ḡuravana ana rupeni.

<sup>8</sup> Tau wairei a babataitoimi, wate tauna, Arua Vivivireinei ina babataitoimi.”

*John, Iesu i babataitōi*  
 (Matthew 3:13-17; Luke 3:21-22)

<sup>9</sup> Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitōi.

---

☆ 1:3: Isa 40:3

10 Ma maranai Iesu wairei i gēgetai, i 'nana da mara i wanatawanei ma Arua Vivivireina me gabubu i gairai.

11 ✨Ma God ponana marei i opu ma i riwa i pa, “Tam, tau natu au nuavaina ma u vinuaiainiu.”

*Satan, Iesu i raelari  
(Matthew 4:1-11; Luke 4:1-13)*

12 Ma lamna au murina God Aruana Vivivireina Iesu i paritawanana-opunei au mutulua.

13 Ma au pom 40 au mutulua i mae. Ma Satan, tauna i raelari. Gamoḡamo gāigaiawai nai au dobuna i mae ma God ana anela marei tauna i paini.

*Iesu, lebalebaḡai ruaḡa ma ruaḡa i raukwatuei  
(Matthew 4:12-22)*

14 Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei.

15 Ma Iesu i ririwa i pa, “God ana mara vinevinena i getai. God ana vibadana vouna rava aubai, lamna i turiai. Ami ḡo'apoapoenā ona rupeni ma ona mae-tavirem ma Riwana Aiaina ona vitumaḡanei!”

16 Mara tagogi Iesu Galili topāna au gerana i bababara nae. Ma lebalebaḡai ruaḡa i 'nanai, Simon\* ma ana tevera Andrew au topa i rarauagida.

17 Iesu i riwei i pa, “Ona nei ma ona votaḡotaḡoiu. Ma me marina iana o tutuarui; nanare, ana viararamanimi da rava ona tuarui da ina vitumaḡaneu!”

---

✨ **1:11:** Gen 22:2; Isa 42:1; Mrk 9:7      \* **1:16:** Wavana ḡelauna Peter

18 Ma maratogogi ai agida i voterei ma Iesu i votaḡotaḡoi.

19 Ma tau i au gera i verau-nae. Iesu, Zebedi natunata i 'nanai, James ma John ai au waga ai agida wanawanarorona i vokaukauei.

20 Ma maratagogi tau i ḡorei, “Taumi ona nei ma ona votaḡotaḡoiu!” Ma tau amai Zebedi† ana taunola maiteni i voterei ma Iesu i votaḡotaḡoi.

*Iesu, arua-apoapoena rava awarina i viaḡaḡana-opunei*

*(Luke 4:31-37)*

21 Iesu ana Tauvotaḡotaḡo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei.

22 Tauna ana rewapanana i viararamana eḡa me mai Jew ai tarawatu babadai § nanare. Ma tau-rautaniḡana ana viararamana i baiei.

23 Maranai Iesu pari au numana i viviararamana ma oroto arua-apoapoena orana i rui ruinia i garara

24 i pa, “Iesu Nasaretei, aiwai e ḡoeḡoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

25 Ma Iesu riwa bagibaginei i riwei i pa, “Ma genuana! Nai orotona ma opu-tawaneii!”

26 Ma arua-apoapoena orotona i viaikwajiei ma ponana i rata, i garara ma i opu-tawanei.

27 Ma rava anatapui i bana-kauei ma tau i ava i vitarapiri, “Wei aiwai? Wei viararamana vouna ma ana rewapanana maiteni! Wei ravana awarina

---

† 1:20: Eng. *Zebedi*. ‡ 1:21: Eng. *Capernaum*. § 1:22: Wariaga BADA, ana Tarawatu Moses i verei mai Israel aubai.

rewapana e mamae da arua-apoapoena i riwei ma tauna i vovoteletelei!”

<sup>28</sup> Iesu nolana, maratagogi i tua Galili au anata-puna.

*Iesu, rava maḡamaḡau i vilawani  
(Matthew 8:14-17; Luke 4:38-41)*

<sup>29</sup> Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae.

<sup>30</sup> Simon poiana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i parivere.

<sup>31</sup> Tauna i nae wavine awarina, nimana i vojijini ma i voagui da i vomairi. Lamna maranaina, ini ḡuḡurana i voterei ma wavinena, tau i paini.

<sup>32</sup> Ma au bigai madeḡa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.\*

<sup>33</sup> Ma rava anatapui nai au melagaina i vitagogiei numa au metaetana.

<sup>34</sup> Ma Iesu, maḡamaḡau ai doria nununai i vilawani ma arua-apoapoe maḡamaḡau rava awari i viaḡaḡana-opunei. Ma arua-apoapoena i aramanei da tauna anina God natuna ma lamna aubaina tau i viḡaei da i genuana.†

---

\* **1:32:** *Madēḡa ina neulai au murina* anona lauvitau ana mara damona. Mai Jew ai lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei. † **1:34:** Iesu i aramanei, mepa da ita kauē da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viḡavia, me tau i e vivinua-notenotei nanare. Jhn 6:15 ma inanai.

*Iesu au Galili i raugugula nae  
(Luke 4:42-44)*

<sup>35</sup> Ubaubanai boiboḡi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari.

<sup>36</sup> Muriai, Simon ana rava maiteni i nae da i baiei.

<sup>37</sup> Ma maranai Iesu i nelaḡai, ma i riwei i pa, “Rava anatapui e baibaiem.”

<sup>38</sup> Iesu i paribelei i pa, “Tana nae taon ḡelau i au ḡereḡere, ma kampa maiteni God Riwana Aiaina ana raugugulei. Tau wei lamna aubaina a nei.”

<sup>39</sup> Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi dorianana i vilawani  
(Matthew 8:1-4; Luke 5:12-16)*

<sup>40</sup> Anina ma rava awarina opi dorianana, i nei Iesu awarina ma au naona i peu ma i raudune ma agu i vibaḡei i pa, “Mepa da ma ḡoei, anina da ma viaiainiu.‡”

<sup>41</sup> Ma Iesu nuabola orana i oai ma urana i viloloi da i vodadani ma i riwa i pa, “Anina a ḡoeḡoei, ma aii!”

<sup>42</sup> Ma maratogogi opi-dorianana, oroto i voterei ma tauna i aii me.

<sup>43</sup> Anina ma Iesu i riwana-guratei i pa,

<sup>44</sup> “Tam ma nae! Aiwai i tuputupua awarim, eḡa rava ma vieḡei! Ma jijimanina ma nae pirisi pulo tau apuna awarina ma vietataiana-melem

---

‡ **1:40:** Mai Jew ai Tarawatu e ririwa da rava lepeleperai, tau mirimirai me dobu ḡela ravai - *Jentail*. Mai Jew amapo nai ravai eḡa ina vodadani. Rava mirimirai eḡa maiteni ina vitaparoro bo au melagai ina mae. Lamna aubaina mepa da rava mirimirana i lawana, tauna ina ai-me, God tauna ina vaimelai ma rava maiteni ina mae ma ina taparoro.

ma viaiaina pulona Moses i ririweia ma kauēi da ina vimataira tauī awari! Pirisi pulo tauapuina ana vianina ina verei da tam u lawana.”

<sup>45</sup> Wate orotona inae mā aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa ega rava ita mamaelana kampa i nae. Wate rava mepa maemaei i nei Iesu awarina.

## 2

*Iesu, oroto gwaḡagwaḡana i vilawani  
(Matthew 9:1-8; Luke 5:17-26)*

<sup>1</sup> Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai.

<sup>2</sup> Ma rava maḡamaḡai i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

<sup>3</sup> Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina.

<sup>4</sup> Rava i maḡa guratana ma ega tagotagogina da ita neiai Iesu awarina, lamna aubaina da tetelei i amgaena da au poewa ma gavogavo i bauni ma kampa gwaḡagwaḡana ana rasirasina i tere-gairei Iesu au naona.

<sup>5</sup> Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, “Natu, am ḡo'apoapoei, a nota-tawanei.”

<sup>6</sup> Anina mai Jew ai tarawatu babadai ḡelauī kampa i kiakiala, au orai i vinua-notanota i pa,

<sup>7</sup> “God ainelana ḡo'apoapoei e notanota tawanei. Aiwai aubaina wei ravana nanare e bababani?”

Tauna, God e vivijiboḡi ma e ririwa da tauna, God nanare.”

<sup>8</sup> Maratagogi, Iesu Aruanei ai nota i vaia ma i riwei i pa, “Aiwai aubaina wei kauai o vivinua-notenotei?”

<sup>9</sup> Metauna i telatela: ḡwaḡagwaḡana ata riwei, ‘Am ḡo’apoapoe a nota-tawanei.’ Bo ata riwei, ‘Ma vomairi, am animatave ma vaia ma ma babara?’

<sup>10</sup> A ḡoei da taumi ona aramanei da Rava Natuna au dobu ana rewapana e mamae da rava ai ḡo’apoapoe ina nota-tawanei ma ina vilawani.” Ma ḡwaḡagwaḡana i riwei i pa

<sup>11</sup> “A riwem, ma vomairi, am animatave ma vaia ma ma nae au numa!”

<sup>12</sup> Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, “Tauai eḡa melanai kaua wenanare ata inanai!”

*Iesu, Levi i kwatuei  
(Matthew 9:9-13; Luke 5:27-32)*

<sup>13</sup> Iesu, Capeniam i voterei ma Galili topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana i vikarei.

<sup>14</sup> Ma i verau-nae aburuna ma Apius\* natuna Levi i ’nanai, ana bagibagi au gabuna i kiakiala ma tax i tamitami Rome gabemanina aubaina. Iesu i riwei i pa, “Ma votaḡotaḡoiu!” Levi i vomairi ma i votaḡotaḡoi.

<sup>15</sup> Tax tautami ma ḡo’apoapoei ravai maḡamaḡau, Iesu ma ana tauvotaḡotaḡo

---

\* **2:14:** Eng. *Alphaeus*.



i votaḡotaḡoi. Ma anapui, Levi ana au numa i kiala gogona ma i amam.†

16 Tarawatu Babadai ḡelau lamna Pharisi, ma tau i 'nanai da Iesu *tax* tautami ma ḡo'apoapoe ravai maiteni i amam. Anina ma Iesu ana tauvotaḡotaḡo i riwei i pa, "Aiwai aubaina Iesu *tax* tautami ma ḡo'apoapoei ravai maiteni e amam?"

17 Ma maranai Iesu wei riwana i nononori ma tau i riwei i pa, "Rava lawalawai, doketa eḡa ita ḡoeḡoei ma rava doridoriai, doketa e ḡoeḡoei. Tau a nei ḡo'apoapoei ravai aubai ma eḡa rava jijimani aubai."

### *Uji vitaraviravirana*

*(Matthew 9:14-17; Luke 5:33-39)*

18 Mara tagogi, John Taubabataito ma Pharisi ai tauvotaḡotaḡo i ujiuji. Ma rava ḡelau i nei Iesu awarina ma i vitara-virevirei, "Aiwai aubaina John Taubabataito ma Pharisi ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?"

19 Iesu i paribelei i pa, "Taumi o notanotai da tau aiavo i raukwatuei tavine ana au torela, ina mae lota bo? Eḡateni kua! Maranai tavitavine vou orotona, tau maiteni e mamae, tau eḡa ina uji.

20 Wate mara ina ḡeta maranai tavitavine vou orotona ina vaitawanei ma lamna maranaina ana rava ina uji."

21 Ma riwa e mamae, "*Tau kua vouna a neiai eḡa me taumi ami kua wadubona nanare.* Eḡa ai ai

---

† 2:15: Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauei. Ma tau kua waduboi amamai ḡariei maiteni i vovoteletelei ma i riwa da aiavo Tarawatu eḡa ita voteletelei lamna tau rava apoapoei, ḡo'apoapoe tau kauei.

ravana, gara vounēi gara au wadubona ina popo-  
ratui da gavogavo ina vopotai. Mepa da nanare  
lamna, gara vouna gara wadubona ina roroi ma  
gavogavo ina rata.

<sup>22</sup> Ma nanare, eġa aiai *wine* vouna ina vaini da  
*wine* aniterenana wadubona ġamoġamo opinei  
au orana ina iwaġi. Mepa da ina kauēi, lamna  
*wine* vouna ina dodo ma *wine* aniterenana  
wadubona ina viaroroi ma *wine* ma aniterenana  
ina wanabauni‡. Wate *wine* vouna, anina da *wine*  
aniterenana vouna au orana ina iwaġi.”

*Iesu ana riwa Sabat aubaina*  
(*Matthew 12:1-8; Luke 6:1-5*)

<sup>23</sup> Mara tagogi au Sabat, Iesu ana tauvotaġotaġo  
maiteni, *witi* wapuna au orana i nēnae. Ma ana  
tauvotaġotaġo *witi* rovei i vaini ma i amam.

<sup>24</sup> Pharisi ġelau i 'nanai wei kauana i kaukauēi  
ma tauī Iesu i riwei, “Ma inanai, ata Tarawatu  
e mamae da Sabat, lamna lauvitau ana mara. Ai-  
wai aubaina tauī e vovobagibagi?”

<sup>25</sup> Iesu i paribelei i pa, “Me peroveta i girugirimia  
nanare. David ana tauvotaġotaġo maiteni am-  
iraġe ma aiwai i kauēi? Taumi o iavi ma aiwai  
aubaina anona, eġa ota vinua-notenotei?”

<sup>26</sup> ✧Pirisi Ġeġetelarana Abiathar ana au mara,  
David, God ana au numa i rui ma palawa vovivi-  
rana i vaia ma ġelau ana tauvotaġotaġo maiteni  
i veri da i ani. Moses ana Tarawatu e mamae da  
pirisi ava palawana e aniani.”

---

‡ **2:22:** Wine e tuputupua ma puropurona wine ana aniterenana  
ina viaisikasikai ✧ **2:26:** 1Sa 21:1-6

<sup>27</sup> Ma Iesu ana riwa au damona i riwa i pa, “God, Sabat i kauei da rava voaguna aubaina ma eġa rava ita kauei Sabat voaguna aubaina.

<sup>28</sup> Ona vinuanotenotei, tau Rava Natuna, lamna aubaina tau anina Sabat badana.”

### 3

*Iesu, Orotu urana irairaġena i vilawani  
(Matthew 12:9-14; Luke 6:6-11)*

<sup>1</sup> Mara ġelauna au Sabat, Iesu i naeme au pari numana ma oroto urana irairaġena i 'nanai kampa i kiakiala.

<sup>2</sup> Ma Pharisi ġelau i ġoei da aiwaiei Iesu ita viwavui. Lamna aubaina i 'nana-taġotaġoi da oroto ita vilawani bo eġa au Sabat.

<sup>3</sup> Ma Iesu, orotona i riwei, “Ma nei, au naoi ma mairi!”

<sup>4</sup> Ma Iesu, ravai i vitara-virevirei i pa, “Sabat au marana, metauna i aii: Aiaina tana kauei bo apoapoena? Tana vilawana bo tana viraġena? Tarawatu aiwai i riwei?” Ma anatapui i genuana.

<sup>5</sup> Iesu ana amloġaiġaina i 'nana viravira ma i 'nanai da tau i orai i bado ma nuanuana i bola-kauei. Ma orotona i riwei i pa, “Uram ma viloloi!” Ma i viloloi ma i lawana.

<sup>6</sup> Ma Pharisi maratagogi i opu ma i nae Herod ana rava awarii\* ma ai oga i tarai da Iesu mena ita viraġenanei.

*Iesu, Patara awari i babani*

---

\* **3:6:** *Herod ana rava anona lamna mai Jew ai boru, tau i aiavo i Rome gabemanina i vovoagui. Tau i ai bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava tau i tavibenabenam ai rava au oiena awarii.*

7-8 Iesu ana tauvotaḡotaḡo maiteni, tau i netawanei ma i nae au gera da ita vilauvitau; ma mai Galili patara ḡaeḡaena i votaḡotaḡo. Rava maḡamaḡau, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ḡelau i waira Jordan taon au babagelauna, Taia taon ma Sidon taon,† tau i anatapui i nei Iesu awarina.

9-10 ☆ Iesu, rava maḡamaḡau i vilawani. Ma lamna aubaina doridoriai maḡamaḡau i viviamdudu ma i ḡoei da tauna ita vodadani. Lamna aubaina ana tauvotaḡotaḡo i riwei da waga i vokaukauei.

11 Maranai, arua-apoapoei rava au orai mae-maei, Iesu i 'nanai ma au naona i peu ma i garara, "Tam God Natuna!"

12 Ma Iesu tau i viḡaei da avena ita vieḡa da tauna aiai.

*Iesu ana Apasol 12 i vinei  
(Matthew 10:1-4; Luke 6:12-16)*

13 Anina ma Iesu i ḡae au ola ma ana ḡoanei nanare, rava i kwatuei da awarina i ḡei.

14 Tauna, nelara 12 i vinei da maiteni ita mae ma muriai ita paritawanei da ita raugugula. Ma i ḡorei *Apasol*.

15 Ma i vovai-virewapani da arua-apoapoei rava au orai ina viopuni.

16 Tau i vinevinei 12 ai wava wenanare,  
Simon i ḡoreḡoreia Peter‡

---

† 3:7-8: Eng. *Tyre & Sidon*. Wei ravana eḡa mai Jew. ☆ 3:9-10: Mrk 4:1 ‡ 3:16: Anona *Ĝaima*.

17 ma Zebedi§ natuna James ma ana tevera John i ġorei Boaneges, anona waiparara natu-  
natuna,

18 Andrew,

Philip,

Batolomeo,\*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

19 ma Judas Iskariotei; \* tauna, Iesu tauviben-  
abenameina.

*Rava i riwa da arua-apoapoei Iesu e vivibadei.*

*(Matthew 12:22-32; Luke 11:14-23; 12:10)*

20 Ma Iesu ana tauvotaġotaġo maiteni i rui au numa. Ma patara i rieiai da tau i eġa tagotagogina da ita am.

21 Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

22 Tarawatu babadai ġelau Jerusalemei i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

---

§ 3:17: Eng. *Zebedi*. \* 3:18: Eng. *Batolomeo*. † 3:18: Eng. *Alphaeus*. ‡ 3:18: Wavana ġelauna Judas - Luk 6:16

§ 3:18: Anona lamna tau i mai Jew ma tau i Rome e viviġaviei.  
\* 3:19: Iskariot, lamna Judas ana melagai wavana da auna lamna Iskariotei. † 3:22: Eng. *Beelzebub*. Anona lamna, *nabugara ai bada*.

23 Lamna aubaina Iesu, wei Babadai i ġorei ma awanainei i pa, “Satan amapo Satan eġa ina viopuni.

24 Mepa da dobu ravai ina viġavia vivira, lamna dobuna ita mae ava.

25 Ma nanare dam ina viġavia vivira, nai damna ita mae ava.

26 Ma Satan ita vomairi ma ita viġaviana-melei, amapo ita mae ava.

27 Taudanene amapo eġa rava virewapanana ana au numa ina danene, eġa da au naona ravana ġuravei ina raġini ma muriai ina danene.

28 Riwa kua a ririwemi da God ami ġo’apoapoei ma ami vijiboġa anatapui ina nota-tawanei.

29 Wate aiai da Arua Vivivireina e vivijiboġi, God, nai ravana ana ġo’apoapoei eġa melanai ina nota-tawanei ma ana ġo’apoapoei ina mae-nonoa.”

30 Iesu wenanare i babani, aubaina rava ġelau i e ririwa, “Iesu au orana arua-apoapoei e mamae.”‡

*Iesu ana dam oina*  
(*Matthew 12:46-50; Luke 8:19-21*)

31 Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

32 Ma patara Iesu i kiala kwaviviroi, ma tau-pariverena i riwei i pa, “Alom ma novunovum ma varevareim au doa ma e ġoeġoem.”

33 Iesu i paribelei i pa, “Aiai alou ma aiavoi varevareiu?”

---

‡ **3:30:** Tarawatu tau girumi i parivaijijigei aubaina tau i ririwa da Arua Vivivireina ana nola lamna baravu da parauma. BADA eġa melanai ai ġo’apoapoei ina nota-tawanei.

<sup>34</sup> Anina ma tau i kiakiala i 'nanai ma i riwa i pa, “Ona inana! Wei tau alou ma varevareiu.

<sup>35</sup> Aiai God ana ġoana e kaukauei, tauna alou ma novu ma vareiu.”

## 4

### *Doa tapuna ma tapuna ai awanaina (Matthew 13:1-9; Luke 8:4-8)*

<sup>1</sup> Iesu, giu i raukarena-melei Galili topana au adana. Ma patara i riei da ita rautaniġanei. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

<sup>2</sup> Ma kua maġamaġau awanainei i giu ma i viararamana i pa,

<sup>3</sup> “Ona rautaniġana! Taupaewa, ana wapu i vokaukauei ma pei i ravi awawari.

<sup>4</sup> Pei ġelau i au eta i peu. Ma kiu i ġeta ma i ani.

<sup>5</sup> Ma pei ġelau i doa au ġaiġaimana i peu, doa au avavana. Ma lamna aubaina maratagogi i gogo.

<sup>6</sup> Wate maranai madeġa i rarani, maratagogi i poi, anona warami eġa ita ġaira guratana doa au orana.

<sup>7</sup> Pei ġelau i modu donadonai au poui i peu. Ma modu donadonai i gogo ma pei i gogogo i lavani, ma eġa ita ua.

<sup>8</sup> Ma pei ġelau i doa au aiaina i peu ma i gogo kua ma i ua, ġelau 30, ġelau 60 ma ġelau 100.”

<sup>9</sup> Ma Iesu i riwa i pa, “Mepa da taniġami e mamae, riwa ona nonori!”

### *Aiwai aubaina Iesu awanainei i babani (Matthew 13:10-17; Luke 8:9-10)*

10 Maranai Iesu ainelana i mamae ma ana tau-votaḡotaḡo 12 ma taurautaniḡana ḡelau i ḡeta ma Iesu i vibaḡai da awanaina anona ita riwei.

11 Ma Iesu i paribelei i pa, “God ana vigulau ana kaua mamae govaḡana; taumi i vieḡemi ma rava au tano maemaei, tau i aiwai anatapui awanainei e paripari-verei.

12 Lamna ana kau ei da wariaḡa peroveta aiwai i girugirumia ina tupua:

‘Tau i ina inana ma eḡa ita inainanai.

Tau i e rarautaniḡana ma eḡa ita araramanei; ma lamna aubaina tau i eḡa ita nenei God awarina da ai ḡo’apoapoe ita notatawanei.” *(Isaiah 6:9-10)*

*Doa tapuna ma tapuna anoi.*

*(Matthew 13:18-23; Luke 8:11-15)*

13 Anina ma Iesu i riwei i pa, “Wei awanainei a babani ma anona eḡa ota aramanei bo? Ma awanaina ḡelau menanare ona aramananei?

14 Taupaewa, God riwana, rava anatapui e paripari-verei.

15 Rava ḡelau orai i bagibagi me etanai. Riwa au tepana e rauraei, wate maratagogi Satan e nenei da riwa rava au orai e vaivai-tawanei.

16 Ma rava ḡelau orai me doa viḡaiḡaimana. Tau i, riwa i nonori ma maratagogi ana nuai ai riwa e vaivaia.

17 Wate warami eḡa da eḡa ita mamae guratana. Ma maranai nuabola bo rau-iviapoapoe e nenei tau i awari, aubaina tau i ai tumagaḡana God awarina e tereterei. Tau i maratagogi e peupeu.

18 Rava ḡelau orai me pei, modu donadonai au orai e gogogolana. Tau i anina riwa e nononori.



19 Wate lawana ai nuabola ma mane ai nu-avainana ma kaua ḡelauī ai au nuaiāi e ruirui ma God riwāna e lavalavani da eḡa ita uaua.

20 Ma ḡelauī, tauī me pei doa au aiaina i peū. Tauī, lamna anina riwa e nononori ma e vaivai-kauei ma e uaua: ḡelauī 30 ma ḡelauī 60 ma ḡelauī 100.”

21 Iesu i riwei i pa, “Rava, eḡa rampa ita neineiāi da iriga au gabaurina ita tereterei bo vatara au gabaurina ta pa? Rampa ana au anikiāla e tereterei ta pa?”

22 Kaua mamae govaḡai, anataputapui a vieḡai ma kaua govagovaḡai nanarena ana vieḡai.

23 Mepa da taniḡami e mamae, riwa ona nonori!”

24 Iesu i riwa i pa, “Aiwai o nononoria ona rautaniḡanana-kauei, ruva o ruveruveia, God nanare awarimi ina ruvai ma ḡelauna ina tavipotoi.

25 Lamna aubaina, mepa da riwau ona aramanei, tau ḡelauna ma ḡelauna ana veremi. Ma tauī eḡa ita aramanei, lamna aiwai aburuna i nononoria, ina vine-boai.”

### *Pei gogogona ana awanaina.*

26 Iesu e ririwa i pa, “God ana vigulau me rava, *witi* peina au doa ita ravi-awawari.

27 Ma waguvara e matamatave ma maratōm e vovomairi ma pei e gogogo ma e rarata. Wate aiwaiei e gogogo, tauna e vivinuanainei.

28 Doa ana nuaina, pei me *witi* e vivigōgi ma e uaua. Au naona e raraupairei ma muriāi e roverove ma muriāi anona e magumagura au tapina.

29 Maranai i magura, rava petona e raraukarei. Tu-aruta marana i ḡetai.”

*Pei aburuoina ana awanaina  
(Matthew 13:31-32, 34; Luke 13:18-19)*

<sup>30</sup> Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi?”

<sup>31</sup> Wenanare, wei aina peina, lamna me gaga peina, pei aburuoina au dobu ma au doa i paewi.

<sup>32</sup> Ma peina i gogo ma i rata da ai muomuoi i ġetawanei ma raġaraġai ġaeġae i terei ma au ġoui, kiu ai noġi ita voai.”

<sup>33</sup> Ma Iesu, awanaina maġamaġau, rava au matai i raugugulei da tau i ai rau-taniġana ana au ruva nanare.

<sup>34</sup> Awanainei, rava awari i ġuġiu, wate ana tau-votaġotaġo ava awari kava anapui i vivieġai.

*Iesu, kojikojira i ravi-daumorai  
(Matthew 8:23-27; Luke 8:22-25)*

<sup>35</sup> Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.”

<sup>36</sup> Anina ma tau i patara i voterei. Ma anapui Iesu, maiteni au waga i geru ma i damana, waga ġelau maiteni.

<sup>37-38</sup> Iesu, waga au murina unutama i terei ma i raunuavuru. Ma kojikojira ġaeġaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana iraġe?”

<sup>39</sup> Ma tauna i vomairi ma ive i viġaei ma i riwei i pa, “Ma genuana!” Ma rabama i riwei i pa, “Ma mae-genuatau!” Ma ive i wanatuini ma daumora ġaeġaena i matave.

40 Iesu ana tauvotaḡotaḡo i riwei i pa, “Aiwai aubaina o rovorovo? Taumi amapo da eḡa ota vitumaḡana!”

41 Ma tau i rovo kua ma i riwa vivira i pa, “Wei aiai ravana da ive ma rabama tauna e vovoteletelei?”

## 5

*Iesu, arua-apoapoena oroto awarina  
i viaḡaḡana-opunei.*

*(Matthew 8:28-34; Luke 8:26-39)*

1 Iesu ana tauvotaḡotaḡo maiteni Galili topana au baba ḡelauna i ḡeta, mai Gerasa ai au dobu.

2 Wei au dobu, arua-apoapoena oroto au orana maemaena.

3-5 Eḡa aiai tagotagogina da ita vovaiubai. Mara maḡamaḡauna, aena ma urana seinei i pani. Wate wei i viaituituini, ma eḡa tagotagogina da seinei ita pani. Marai ma waguvarai i nene-labalababa ma i garagarara ma ḡaimei tupuana i boribori-melei ma au kokoaga ma au ola i raunuma.

6 Maranai Iesu wagei i opuopu, arua-apoapoei orotona i ruiuinia, aueia Iesu i 'nanai ma kokoagei i ruba ma Iesu au naona i mae-peu ma i raudune.

7-8 Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ḡoeḡoei? God wavanei a vivibaḡaim da eḡa ma kovoḡiu!”

9 Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maḡa, aubaina tau wavau lamna Ġavia Patarana.”

10 Ma arua-apoapoei, Iesu i vibaḡa-guratei da avena nai dobunei ita viopuna-tawanei.

11 Ma poro boruna ḡaeḡaena au ḡereḡere ola au adana i labalaba.

12 Ma arua-apoapoei, Iesu i vibaḡai, “Ma paritawanelai poro au orai ana rui.”

13 Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ḡaira da au topa i monu.

14 Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua.

15 Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo kaua.

16 Ma aiwai i tupua orotona ma poro awari, tau i 'nainanaia, rava i riwana-naiei.

17 Ma dobuna ravai, Iesu i vibaḡai da dobuna ita oputawaneii.

18 Iesu au waga i gerugeru ma orotona, Iesu i vibaḡai i pa, “Tau maiteni tana nae.”

19 Iesu i viḡaei ma i riwei i pa, “Ma naeme am au dam. Ma BADA kaua aiwai ḡaeḡaena i kaukaueia ma ana iviaiai tam awarim, tau ma parivereii.”

20 Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma tau i anatapui i nononoria i baiei.

*Iesu, Jairus natuna wavinena ma wavine dori-doriana i vilawani.*

*(Matthew 9:18-26; Luke 8:40-56)*

<sup>21</sup> Iesu wagei i damana me topa au baba gelauna. Maranai kampa i geta ma topa au adana, ma patara i rieiai.

<sup>22</sup> Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

<sup>23</sup> ma i vibaḡa-guratei i pa, “Natu guguinina e irairaḡe. Ma nei ma uram au inina ma terei ma ina lawana.”

<sup>24</sup> Anina ma Jairus, Iesu maiteni i nae ma patarana i mae gariḡuruvi ma i votaḡotaḡoi.

<sup>25</sup> Wavine tagogi kampa patarana au orana awarina tara-doriana i mae da madeḡa 12 i kwa.

<sup>26</sup> Ana mane anataputapuna, dokedoketa maḡamaḡau awarii i tawanei ma eḡa tagotagogina ita vilawani ma amapo da ana doria i rarata.

<sup>27-28</sup> Tauna, Iesu nolana ma ana babani i nonori ma au orana i vinua-notanota i pa, “Mepa da ana gara ava ana vodadani ma ana lawana.” Ma tauna, Iesu murinei i nei ma ana gara i vodadani.

<sup>29</sup> Maratagogi, tara-doriana i wanatuini ma malana i vaia da i lawana.

<sup>30</sup> Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, “Aiai au gara i vodadani?”

<sup>31</sup> Ana tauvotaḡotaḡo, tauna i riwei, “Ma inanai, patara i mae gariḡuruvim! Ma menanare da u riwa ‘Aiai i vodadani?’”

<sup>32</sup> Wate Iesu i 'nana viravira da ita inanai aiai i vodadani.

<sup>33</sup> Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i viegei.

<sup>34</sup> Anina ma Iesu, wavine i riwei i pa, “Natu, am tumaḡana i vilawanim. Am doria i kwa, ana nu-aubam ma nae!”

<sup>35</sup> Maranai i bababani ma rava ḡelau i Jairus ana numei i nei ma i riwei i pa, “Natum ana mara i kwa. Eḡa Taugiu ma visina-viravirai.”

<sup>36</sup> Iesu ai babani i nonora-tawanei ma Jairus i riwei i pa, “Eḡa ma rovo, ma vitumaḡana!”

<sup>37</sup> Iesu, rava ḡelau i viḡaei ma Peter ma James ma ana tevera John maiteni i nae.

<sup>38</sup> Ma Jairus ana au numa i ḡeta ma Iesu, patara i 'nanai; i toutou ma i taratarakwatu

<sup>39</sup> ma i rui ma tau i riwei i pa, “Aiwai aubaina o taratara-kwatu ma o toutou? Tevera eḡa ita irage, tauna e matamatave ota.”

<sup>40</sup> Ma tau, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaḡotaḡo tonuḡa maiteni i rui mepa tevera i matamatave lana.

<sup>41</sup> Iesu, tevera nimana i vaia ma i riwei i pa, “*Tal-itha kour!*” wei anona, “Kukuma, ma vomairi!”

<sup>42</sup> Maratagogi i vomairi ma babara i vikarei (Tauna ana madeḡa 12). Ma tau i ba kaua.

<sup>43</sup> Iesu, tau i riwana-guratei da eḡa aiai ita viegei ma i riwa da ita viambagibagi.

## 6

### *Mai Nasaret, Iesu i parivirevirei*

<sup>1</sup> Iesu ana tauvotaḡotaḡo maiteni nai dobuna i netawanei ma i naeme ana au melagai.

<sup>2</sup> Ma Sabat marana i ġeta ma tauna giu i vikarei au pari numana. Ma rava maġamaġau i riei da i rautaniġanei. Taudi anatapui i baiei ma i vitaraviravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?”

<sup>3</sup> Anina ma taudi ava i babani vivira i pa, “Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

<sup>4</sup> Iesu, taudi i riwei i pa, “*Peroveta* dobu au ġelau i vivivirei, wate ana au melagai, ana rava ma ana dam oina, eġa ita vivivirei.”

<sup>5-6</sup> Tauna i baiei da rava eġa tauna ita vitumaġanei. Ma eġa tagotagogina da kaua vivirewapanai kampa ita kau i tauna urana, rava ruaġa ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

*Iesu ana Apasol i paritawanei da ita viararamana*

<sup>7</sup> Ma Iesu, taudi 12 i ġoreiai ma ruaruagei ava i paritawanana-opunei ma rewapana i verei da arua-apoapoei ina viaġaġana-opunei.

<sup>8</sup> Ma riwa bagibaginei i riwei i pa, “Ami au vaġai, eġa aiwai ona vaia anina jiġona ava; eġa lam, eġa autu bo mane au urami.

<sup>9</sup> Ae uma ona oteni ma eġa kwama ġelauna ona vaia.”

<sup>10</sup> Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei.

<sup>11</sup> ✧ Mepa da au melagai o ġeta ma rava

eġa ita vianinemi bo eġa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da tau i ai wavu!”\*

<sup>12</sup> Ma tau i opu ma rava awari i raugugula ma i riwei i pa, “Taumi ami ġo’apoapoei ona voterei ma ona mae-taviremi God awarina!”

<sup>13</sup> Tau i, arua-apoapoei i viaġaġana-opunei. Ma rava doridoriai maġamaġau i, olive oirana au kolai i buloi ma i vilawani.

### *John Taubabataito ana iraġe*

<sup>14-16</sup> ✧ Iesu nolana i nae da rava anatapui i aramanei ma tauna i babanie i. Ma rava ġelau i ririwa i pa, “Tauna, kaua vivirewapanai e kaukaue i, aubaina tauna John Taubabataito iraġele i vomairi me.” Ġelau i ririwa i pa, “Tauna Elijah i nememe i.” Ma ġelau i ririwa i pa, “Tauna peroveta wariġai nanare.” Ma gulau Herod,† nolana i nonori ma i riwa i pa, “Tau, John Taubabataito uana a borituini; marina i vomairi me.”

<sup>17-20</sup> John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġiriġiriei i pa, “Tarawatu e mamae da eġa vareim awana ma kwalei.” Ma Herod, riwa

---

\* **6:11:** Wariġa mai Jew, tauvaġa i e nenememe i au Israel. Tau i au aei pokau e rarauabuabui maranai Israel ana au parata e ġeġeta, lamna tau i orai e viaiaini. Ma Iesu ana tauvotaġotaġo wei i kaue i da melagai ravai ina notai, “Tauvotaġotaġo e ririwa da tauta orata apoapoena me tauta eġa mai Jew.” ✧ **6:14-16:** Mrk 8:28

† **6:14-16:** Herod Antipas, Galili ana Wavalatona.



i paritawanei da John i pani da panipani au numana i terei. Herod ana nuaiaina, John i rarautaniġanei. Wate nuanuana i raġaraġa.

Ma Herodias, John awarina amlona i ġaiġai ma viraġenana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eġa tagotagogina da aiwai ita kauei.

<sup>21</sup> Ma wavine, gavogavo i'nana, maranai Herod ana tupua marana iġeta ma torela i vokaukauei. Ma gabemani babadai ġaeġaei ma sorodia ai babada ġaeġaei ma Galili babadai i raukwatuei.

<sup>22</sup> Ma Herodias natuna wavinena i nei ma i ara. Herod ma tau maiteni i amam i vinuaiaini. Ma gulau, guguini i riwei i pa, “Aiwai u ġoeġoeia ma vibaġai ma ana verem!”

<sup>23</sup> Ma i parivainuaġani i pa, “God au matana a ririwem da aiwai u vivibaġeiu ana verem da au vigulau navanavana au paratana.”

<sup>24</sup> Ma tevera wavinena i opu ma alona i paridadanei i pa, “Aiwai ana vibaġei?”

Ma i paribelei i pa, “John Taubabataito kolana.”

<sup>25</sup> Ma maratagogi i vipaparana ma gulau awarina i rui ma i vibaġai i pa, “A ġoeġoei da marina John Taubabataito kolana ma vereu au aboma!”

<sup>26</sup> Ma gulau nuanuana i bola-kauei. Wate parivainuaġana boiboġi i kauei tau i amam au matai. Ma lamna aubaina guguini, aiwai i vivibaġei anina i vianinei.

<sup>27</sup> Ma tauviraḡena i paritawanei ma i riwei da John kolana ita neiai. Ma i nae panipani au numana ma John uana i borituini.

<sup>28</sup> Ma kolana au aboma i terei ma guguini i verei ma guguini, alona i verei.

<sup>29</sup> Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga i vimataveni.

*Iesu, nelara 5,000 i viambagibagi*

*(Matthew 14:13-21; Luke 9:10-17; John 6:1-14)*

<sup>30</sup> *Apasol* i ḡeta memei ma aiwai anaputapuna i kaukauei ma i raraugugulei, Iesu i vieḡei.

<sup>31</sup> Lamna maranai, rava maḡamaḡai i nenei ma i nenaē da Iesu ana tauvotaḡotaḡo maiteni eḡa gavogavo ita maemaē da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.”

<sup>32</sup> Ma anapui wagei i nae au mutulua.

<sup>33</sup> Wate rava maḡamaḡai i 'nanai i nenaē ma i aramanei tau aiavoi. Ma melagai nununai anapui geraei i ruba gogona da au dobuna i aiḡeta.

<sup>34</sup> Maranai Iesu wagei i tuopu au gera ma patara ḡaeḡaena i 'nanai ma nuanuana i bola-kauei. Tau me sipu ma eḡa ai tauvipaipai. Ma Riwana Aiaina viararamanai i raukarei.

<sup>35</sup> Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere.

<sup>36</sup> Rava ma paritawanei da ina nae au melagai ma au wapu au ḡereḡere da ai lam ina gimarai.”

<sup>37</sup> Wate Iesu i paribelei i pa, “Taumi ona viambagibagi!” Ma tau i paribelei i pa,

“Mepa 200 *denarii*‡ tana vaia da wei patarana tana viambagibagi?”

38 Ma Iesu i paridadanei i pa, “Palawa biaġa awarimi? Ona nae ma ona baiei!”

Maranai i nelaġai ma i riwa i pa, “Awariai, palawa five ma iana ruaġa.”

39 Anina ma Iesu, patara i riwei i pa, “Boru nununai, gidagida au majimajiġai ona kiala nae.”

40 Ma tau i ai au boru 50 da 100 nanare i kiala nae.

41 Ma Iesu, palawa five ma iana ruaġa i vaia ma i ġoutata au mara ma God i viegualaei. Ma palawa i vogimagimai ma iana i ġutai da ana tauvotaġotaġo i verei ma tau i, rava i verei.

42 Ma patara i am ma i am-iaua.

43 Ma ana tauvotaġotaġo, lam am tereterenai i tuarui da poa muomuoi 12 i vioai.

44 Nelara 5,000 i viambagibagi.

*Iesu, waira au tepana i babara  
(Matthew 14:22-33; John 6:15-21)*

45 Anina ma Iesu, ana tauvotaġotaġo i egari da ita aidamana au Bethsaida.§ Tau i waga i geru da i nena ma tauna, patara i paritawanei.

46 Patara i paritawanei ma tauna ava i ġae au ola da ita raupari.

47 Ma waguvara ana tauvotaġotaġo au waga au topa ma Iesu au alala.

48 Ma ana tauvotaġotaġo, lare i vovoguratei da ita ġota wate ive i viraumatamatani. Ma maratommom nanare, Iesu i nae awari. Tauna waira au tepana i bababara ma i ġoei da tau i ita tutelarei.

---

‡ 6:37: 200 denarii. Denarius tagogi lamna taubagibagi ai maia au pom tagogo nolana aubaina. § 6:45: Eng. *Bethsaida*.

49-50 Ma maranai tau, Iesu i 'nanai topa au tepana i bababara ma i notai da tauna konaġa ma i rovo kaukua ma i vigaragararei. Ma maratagogi Iesu i riwa i pa, "Tepami ina tora! Tau, eġa ona rovo!"

51 Ma au waga i geru ma ive i wanatuini ma tau i bana-kauei.

52 Avena da kua palawa awarina i kauei i 'nanai, wate ana rewapana eġa ita aramana-kauei. Tau orai i bado ma i vinuanaina.

*Iesu, rava doridoriai maġamaġau i au Genesaret i vilawani*

*(Matthew 14:34-36)*

53 Tau, topa i damani ma au Genesaret i ġota ma ai waga i raġini.

54 Tau, waga i oputawanei ma rava, Iesu i 'nanai ma maratagogi i aramane i da tauna.

55 Iesu nolana, Galili provins anapui i naeni ma i nonori da tauna mepa i mamae. Ma kampa, doridoriai rasirasiei i vivaneiai.

56 Iesu mepa i nenelana, melagai ġaeġae ma muo-muoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaġa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

## 7

*Amamami ai giu*

*(Matthew 15:1-9)*

1-4 Pharisi ma Jew anapui, magumagura ai giu maġamaġau e notanota-jijini. Tau, ai ani-uma ma ai aniam anapui e oġaoġai lamnei tau

e viaiaina-melei God au matana. Ma maranai au maket da e nenei, urai ina oġai ma ina am. Taiu eġa ina am da au naona urai ina oġa kauē me ai magumagura ai giu nanare.

Maratagogi Pharisi ġelau ma Tarawatu Babadai, Jerusalem ei i nei Iesu awarina da ita rautaniġanei. Ma taiu i 'nanai da Iesu ana tauvotaġotaġo ġelau, urai eġa ita oġai ma i amam.

<sup>5</sup> Ma taiu, Iesu i vitara-virevirei i pa, “Aiwai aubaina am Tauvotaġotaġo magumagura ai giu, eġa ita votaġotaġoi ma ana ura miramirai e amam?”

<sup>6</sup> Ma Iesu i paribelei i pa, “Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

‘Wei ravai ipiriei e vovoepaepaiu,  
wate nuanuai aueia.

<sup>7</sup> Taiu rava ai giu e viviararamani.

Lamna aubaina ai voepaepa anona eġa.  
(*Isaiah 29:13*)

<sup>8</sup> Taumi, God ana Tarawatu o teretere-tawanei ma ami giu o votaġotaġoi.”

<sup>9</sup> Ma i riwana-melei i pa, “Taumi o aramana kaua da God ana Tarawatu o gedugeduaiei ma amamami ai giu o vovotaġotaġoi.

<sup>10</sup> ✧ God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viraġeni.*

<sup>11</sup> Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awariu e mamae da ata voaguim; wate lamna *Corban* - a tereriei pulo, God aubaina.’

---

✧ **7:10:** Exo 20:12; Exo 21:17

12 Wei viararamanana, tau i e viviḡaei da amana ma alona ina voagui.

13 Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡau i ḡelau i maiteni o kaukauei.”

*Metauna kauai, rava orai e vivimirai.  
(Matthew 15:10-20)*

14 Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei.

15-16 Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”\*

17 Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai.

18-19 Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

20 Anina ma i riwa i pa, “Aiwai, rava oranei e opuopu; lamna, rava e vivimirai God au matana.

21 Anina rava nuanuanei vinuanotanota apoapoei e opuopu me: viawawana labalababa, danene, viraḡena, awadanene,

22 ambo, rau-iviapoapoe, moru, erawa, unura, terevaideḡa, mae-ḡaeḡae ma opa.

23 Wei kauai apoapoei anatapui oranei e opuopu ma rava e vimiramirai.”

---

\* **7:15-16:** Giruma ḡelau Mark uranei i girugirumia wei riwai we-nanare e mamae, “*Mepa da taniḡami e mamae, ona rautaniḡana.*”

*Jentail wavine,† Iesu i vitumaḡaneī  
(Matthew 15:21-28)*

24 Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramaneī da tauna kampa, wate eḡa tagotagogina da ita raugovaḡa.

25-26 Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni.

27 Iesu i aramaneī da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

28 Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e rauraua e aniani.”

29 Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

30 Ma wavine i naeme au numa. Natuna wavinena i ’nanai i matamatave, arua-apoapoena boibogi tevera i opu-tawanei.

*Iesu, oroto taniḡa-potapotana ma mena birebirena  
i vilawani*

---

† 7:23: Rava eḡa mai Jew. ‡ 7:27: Riwa roaroa wei au awanaina lamna mai Jew. Tauī e notanotai da tauī i ai guratana eḡa me rava ḡelauī. Lamna aubaina tauī dobu ḡelauī ravai e ḡoreḡorei auou.

<sup>31</sup> Iesu Taia ma Sidon ana parata i netawanei ma au babaġela Dekapolis i verautuini ma i nae au Galili topana.

<sup>32</sup> Orotu taniġana potapotana ma menana bire-birena i neiai Iesu awarina ma i vibaġai da urana au inina ita terei da ita vilawani.

<sup>33</sup> Iesu, oroto i taravaina-opunei da tau i ava ma ura-gigina, oroto au taniġana i terei ma ura-gigina ġelauna i ovai ma menana i vodadani.

<sup>34</sup> Nuanuana i bolai ma i ġoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!”

<sup>35</sup> Maratagogi taniġana i wanatawanei ma menana i vidagudagu ma i babani kaua.

<sup>36</sup> Ma Iesu, tau i viġaei da aiwai i tuputupua, avena rava ita vieġei. Iesu, rava i viġaei; wate tau i eġa ita rautaniġana ma riwa i vituai.

<sup>37</sup> Ma maranai ravai wei i nonori, tau i bana-kauai ma i riwa i pa, “Aiwai anatapui i kauana-kauai. Tauna, rava taniġa potapotai e vivilawani da e rarautaniġana ma menabirebirei e bababani.”

## 8

*Iesu, rava 4,000 i viambagibagi  
(Matthew 15:32-39)*

<sup>1</sup> Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa,

<sup>2</sup> “Au pom tonuġa patara maiteni a mae ma ai lam eġa ma a rau-nuapoapoelei.

<sup>3</sup> Tau i ġelau, uamei i nei. Mepa da ana am-iraġe ana paritawanei ai au numa, ma au etanai ina raumolaġau.”



<sup>4</sup> Ma ana tauvotaḡotaḡo i paribelei i pa, “Wei mutulia ma mepa lam tana vaia da wei patarana tana viambagibagi?”

<sup>5</sup> Ma Iesu, tau i paridadanei i pa, “Awarimi palawa biaḡa?”

Tau i riwa i pa, “seven.”

<sup>6</sup> Ma Iesu, patara i riwei da au doa i kiala. Ma palawa seven i vaia ma God i viegualaei ma i vogimagimai ma ana tauvotaḡotaḡo i verei da patara i verei.

<sup>7</sup> Ma tau awari, iana muomuoi ruaḡa ota. Iesu i vaia; God i viegualaei ma ana tauvotaḡotaḡo i verei da patara i verei.

<sup>8</sup> Tau anapui i am da i am-iaua. Ma lam am tereterenai i tuarui da poa ḡaeḡaei seven i vioai.

<sup>9</sup> Rava 4,000 i viambagibagi. Ma muriai i paritawanei ai au numa.

*Pharisi, God ana mataira i vibaḡei  
(Matthew 15:39-16:4)*

<sup>10</sup> Maratagogi, Iesu ana tauvotaḡotaḡo maiteni au waga i geru ma i nae Damanuta ana au parata.

<sup>11</sup> Pharisi ḡelau i nei ma viparipariḡai i vikarei Iesu maiteni. Tau i ḡoei da Iesu ita raudadani da mataira Godei ita viatataiei.

<sup>12</sup> Iesu, Aruanei i lavutu tawanana ma i riwa i pa, “Wei kimta voui, aiwai aubaina mataira e ḡoeḡoei? A ririwana-kauemi, amapo mataira eḡa ona inanai.”

*Iesu, ana tauvotaḡotaḡo I parivainotai*

<sup>13</sup> Anina ma Iesu, patara i netawanei ma ana tauvotaḡotaḡo maiteni au waga i geru me ma i damana Topa Galili au baba ḡelauna.

14 Ma ana tauvotaḡotaḡo, nuanuai i vuru da ai palawa ita vaia ma palawa tagogi ava au waga i mamae.

15 Iesu, tau i parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me yist.\*”

16 Ma tau i babani vivira i pa, “Tauta eḡa ata palawa aubaina da e ririweta.”

17 Ma Iesu i aramanei ma tau i riwei, “Aiwai aubaina o bababani da taumi awarimi eḡa palawa? Taumi amapo da eḡa ota aramana ma o vivinuanaina? Orami i bado bo?”

18 ✧Matami e mamae ma eḡa ota inainana. Ma taniḡami e mamae ma eḡa ota nonora. Ma o vinuanotanota bo eḡa?

19 Maranai palawa five a vogimagimai rava 5,000 aubaii, lam am tereterenai o tami da poa biaḡa o vioai?”

Tau i paribelei, “Twelve.”

20 “Ma maranai palawa seven a vogimagimai rava 4,000 aubaii, lam am tereterenai o tami da poa ḡaeḡaei biaḡa o vioai?”

Tau i paribelei, “Seven.”

21 Ma tau i riwei i pa, “Ma amapo da o vivinuanaina!”

*Iesu, oroto mata apoapoena i vilawani au Bethsaida*

---

\* **8:15:** Yist mai Jew awarii awanainei lamna aiwai da apoapoe, mira bova e vititua bo e vivimaḡai. Weka Iesu mai Pharisee ma mai Herod ai lawana ma ai giu morumorui e babaniei, da eḡa ina tua.

✧ **8:18:** Mrk 4:12

<sup>22</sup> Tau i nei au Bethsaida ma rava ġelau, oroto matana apoapoena i neiai Iesu awarina ma i vibaġa-guratei da ita vodadani.

<sup>23</sup> Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

<sup>24</sup> Ma i taepai ma i riwa, “Rava a inainanai ma tau i me ai ita bababara.”

<sup>25</sup> Iesu, urana i tere-melei oroto au matana. Ma matana i wanatawanei da aiwai anatapuna i 'nana-kauei.

<sup>26</sup> Iesu, tauna i paritawanei ana au numa ma i riwei, “Eġa ma nae au melagai! Wate jijimanina ma nae au numa.”

*Peter i riwa da Iesu, tauna Keriso  
(Matthew 16:13-16; Luke 9:18-20)*

<sup>27</sup> Iesu, ana tauvotaġotaġo maiteni i nae melagaili Caesarea Philipai au ġereġerei. Maranai i nena ma Iesu, tau i paridadanei, “Rava e ririwa; tau aiai?”

<sup>28</sup> ✧Ma tau i paribelei, “Ġelau e ririwa da tam, John Taubabataito. Ma ġelau Elijah. Ma ġelau e ririwa da peroveta wariaġana tagogi.”

<sup>29</sup> Ma Iesu, tau i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana *Messiah* - anona Keriso.”

<sup>30</sup> Iesu, tau i viġaei da eġa aiai ina riwei da tauna aiai.

*Iesu ana iraqe ma ana vomairi me i babaniei  
(Matthew 16:21-23; Luke 9:21)*

---

✧ 8:28: Mrk 6:14-15

31 Ma Iesu i raukarei da ana tauvotaḡotaḡo i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina viraḡeni. Ma au pom tonuḡa au murina ina vomairi me.”

32 Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei.

33 Wate Iesu i mae-tavirei ma ana tauvotaḡotaḡo i ’nanai. Ma Peter i eni, i pa, “Satan ma nae au muriu! Tam am nota eḡa Godei ita nenei, eḡa da ravei.”

*Iesu votaḡotaḡona anona  
(Matthew 16:24-28; Luke 9:23-27)*

34 Ma Iesu, patara ma ana tauvotaḡotaḡo i raukwatuei ma i riwei, “Mepa da aiai ita votaḡotaḡoiu. Tauna ina boviaana-melei ma ana korosi ina avarai ma ina votaḡotaḡoiu.†

35 Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelei.

36 Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai.

37 Wate aiwaiei am lawana ma gimara-melei.

38 Mepa da aiai: tau ma au viararamana ina vinimalei; ma i mae-puputeu; ma ana ḡoanei kaua apoapoe ina kaukauei. Rava Natuna, tauna

---

† **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelaḡai aubaina tau, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna.

ina vinimalei maranaina ina nememei; Amana ana au boruma anela vivivirei maiteni.”

## 9

<sup>1</sup> Ma Iesu, wenanare i riwei, “Taumi a ririwana-kauemi; rava ġelaumi weka o maimairi amapo eġa ona iraġe da God ana vigulau ona inanai ana rewapanana ina nei.”

*Iesu inanana i virai  
(Matthew 17:1-13; Luke 9:28-36)*

<sup>2</sup> Au pom six muriai, Iesu, Peter, James ma John i taravaini. Ma tau i ava i ġae ola ġaeġaena au tepana. Ma kampa tau i matai, Iesu inanana i virai.

<sup>3</sup> Ana gara i arapora ma gamrina i vimata-kamokamota; eġa me aiwai ġelauna au dobu nanare.

<sup>4</sup> Ma kampa au matai, Elijah ma Moses i eġa. Ma Iesu maiteni i bababani.

<sup>5</sup> Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!”

<sup>6</sup> Ma tau i rovo kua ma Peter eġa ita aramanei da aiwai i latolaton.

<sup>7</sup> ✧ Anina ma apau i eġa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rautaniġaneil!”

<sup>8</sup> Maratagogi tau i 'nana viravira ma eġa aiai ġelauna ita inanai ma Iesu, tauna ava.

<sup>9</sup> Ma maranai olei i ġaiġairai ma Iesu, tau i viġaei da aiwai i 'nananaia eġa ina vieġai da au naona Rava Natuna iraġelei ina vomairi me.

10 Ma tauī, wei riwana i voteletelei ma i babani vivira i pa, “Iraḡelei vomairi me anona aiwai?”

11 Ma tauī, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”\*

12 Iesu i paribelei, “Riwa kaua Elijah au naona ina nei da aiwai anapuna ina vokaukauei. Aubaina wariāḡa i girumi da Rava Natuna ina vinuapoapoe kaua ma ina inana-geduaiei.

13 Wate a ririwana-kauemi da Elijah anina i nei ma rava, ai ḡoanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni*

*(Matthew 17:14-21; Luke 9:37-43a)*

14 Iesu ana tauvotaḡotaḡo tonuḡa maiteni olei i ḡaira memei ai rava awari ma patara ḡaeḡaena, tauī i gariḡuruvi. Ma Jew ai tarawatu babadai, tauī maiteni i vivitarapiri.

15 Maranai patara, Iesu i ’nanai. Tauī orai i auepai ma awarina i ruba ma i viegualauēi.

16 Iesu, tauī i vitara-virevirei, “Aiwai o vitarapiriei?”

17 Orototagōgi patara au poui i paribelana, “Tau-viararamana, arua-apoapoena natu orotona au orana e mamae ma i kauēi da eḡa ita bababani, lamna aubaina a neiāi awarim.

\* **9:11:** Mai Jew i vitumaḡana da *Elijah* au naona ina nememei ma *Keriso* muriai ita nei. (Mal 3:1, 4:5-6). Ma tauī eḡa ita notai da *Elijah* rau-iviapoapoe ina nelaḡai ana au nememei. † **9:13:** Iesu lamna John Taubabataito i bababaniei da tauna *Elijah* (Mat 11:13-14, 17:10-13)

18 Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ġiriġiriei; ma inina e badobado. Am tauvotaġotaġo a vibaġai da arua-apoapoena ita viopuni, wate eġa tagotagogina da ita kauei.”

19 Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana ’vara ġaġalei? Tevera awariu ona neiai!”

20 Ma tevera i neiai Iesu awarina. Ma maranai arua-apoapoena, Iesu i ’nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro.

21 Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai.

22 Arua-apoapoena mara au anatapuna, tauna ai au araratana ma au waira e tawatawanei ma i ġoei da ita viraġeni. Mepa da tam tagotagogina; ma raunu’apoapoelelai ma ma voagui!”

23 Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaġana, God anatapuna ina kauei tauna aubaina.”

24 Maratagogi tevera amana i garara, “A vitumaġana, wate au tumagaana eġa ita rata ma ma voagui da ina rata!”

25 Iesu i ’nana da patara i rierieiai awarii ma lamna aubaina arua-apoapoena i egari i pa, “Tam arua taniġa-potapotana ma gumgum. Tau a egaegarim da tevera ma opu-tawanei. Ma eġa melanai au orana ma rui me!”

26 Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maġamaġau kampa i riwa, “Tauna i’raġe!”

27 Ma Iesu, tauna urana i vojijini ma i sinaepai da i mairi.

28 Muriai Iesu, ana tauvotaḡotaḡo maiteni i rui au numa. Ma maranai tau i ava ma i paridadanei i pa, “Aiwai aubaina tauai eḡa tagotagogina da arua-apoapoenā ata viopuni?”

29 Iesu, i riwa, “Arua-apoapoei me wenanare, pari ainelana ina viopuni.”

*Iesu ana iraḡe i babaniana-melei  
(Matthew 17:22-23; Luke 9:43b-45)*

30 Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da tau i mepa.

31 Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau i urai. Ma tau i ina virāḡeni. Wate au pom tonuḡa au murina ina vomairi me.”

32 Wate tau i eḡa ita aramanei tauna aiwai i babaniei. Ma pari-dadanana i rovoei.

*Tauvotaḡotaḡo i vitarapiri vivira da aiai i ḡetelara  
(Matthew 18:1-5; Luke 9:46-48)*

33 Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitaravirevirei, “Au etanai aiwai o vitarapiriei?”

34 Wate tau i genuana, aubaina au etanai tau i vitarapiri vivira da aiai i ḡetelara.

35 ✧ Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

---

✧ 9:35: Mrk 10:43-44



<sup>36</sup> Ma Iesu, tevera i vaia ma au poui i vimairini. Ma urana au jīgona i tere-taḡonei. Ma tau i riwei i pa,

<sup>37</sup> “Aiai ravana; tau wavauei, tevera wenanare i rauḡorei. Lamna tau maiteni e rarauḡoreiu. Ma aiai da tau e rarauḡoreiu. Lamna tauparitawaneu maiteni e rarauḡorei.”

*Aiai eḡa ata ḡavia, lamna turata  
(Luke 9:49-50)*

<sup>38</sup> Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoenā i viviopuni ma tauna eḡa turata. Lamna aubaina a viḡaei da eḡa ina kauana-melei.”

<sup>39</sup> Iesu i riwa, “Eḡa ona viḡaei! Eḡa aiai au wavau kaua babai ina kauē ma muriai ina parivai-apoapoeniu.

<sup>40</sup> Aiai ravana eḡa ata ḡavia; lamna turata.

<sup>41</sup> Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaḡotaḡo. Tau ai maia eḡa ina vine-boai.”

*Rauelara babanina  
(Matthew 18:6-9; Luke 17:1-2)*

<sup>42</sup> Aiai ravana i kauē da wei teverana ana tu-maḡana Tau awariu i viapoapoeni da ḡo’apoapoe i kauē. Lamna i ai da ḡaima ḡaeḡaena ravana au uatabana ina duri ma au boga ina tawanei aubaina God, tauna ina kovoḡa-guratei. <sup>43-44</sup> Mepa da nimam i kauem da ḡo’apoapoe u kauē. Ma bori-tawanei! I aii da nimam tagogiava ma lawana mamae-nonoana ma vaia. Ma eḡa ma kauē da nimam ruaḡa aiiai ma ma nae ai au menamenana; mepa ai eḡa melanai ita bobo.‡

‡ **9:43-44:** Wariḡa nimaiei i giruma damanei tau riwana tagogina me vs 48.

45-46 Mepa da aem i kauem da ḡo'apoapoena u kauēi. Ma bori-tawaneī! I aii da sigesigem au lawana mamae-nonoana ma rui. Eḡa me aem ruaḡa aiaii ma ai au menamenana ina tawanem.Š

47 Ma mepa da matam ina kauem da ḡo'apoapoena u kauēi. Ma vaitawaneī! I aii da matam tagogi ma God ana vigulau ma rui. Eḡa me matam ruaḡa ma ai au menamenana ina tawanem;

48 dobuna motamotana eḡa ita irairaḡe ma ai eḡa ita bobo.

49 Au Tauvotaḡotaḡo anataputapui, ai ararataneī ina bogai.

50 “Nia i ai lam viaiainana aubaina. Ma mepa da i tomatoma, mena ma vidagianeī. Nia au orami ina mae ma ona viturana vivira!”

## 10

### *Iesu, tavine vilamonana i babaniei*

1 Ma Iesu, dobuna i netawaneī ma i nae Judea ana paratana. Ma Waira Jordan i damani da au baba ḡelauna. Patara ḡaeḡaena i riana-melei. Ma Iesu i viararamana, me mara patapatana i kaukauei nanare.

2 Ma Pharisi ḡelauī i ḡoei da tauna ita waroi. Ma lamna aubaina i vitara-virevirei, “Tarawatu e mamae bo eḡa da rava, awana maiteni ita vilamonei?”

3 Ma Iesu i paribelei, “Moses ana Tarawatu aiwai e ririwei?”

---

Š 9:45-46: Wariaḡa nimaiei i giruma damaneī tauī riwana tagogina me vs 48.

<sup>4</sup> Ma tau i riwa, “Moses ana Tarawatu e ririwa da oroto *vilamona pepana ina girumi ma awana ina verei. Ma tau i vilamonei.*”

<sup>5</sup> Iesu i paribelei, “Taumi orami i bada. Au baina Moses wei Tarawatuna i terei.

<sup>6</sup> ✧Wate ona notai da au karena, maranai God raya i kauēi *ma tauna oroto ma wavine i kauēi.*

<sup>7</sup> ✧*Ma lamna aubaina oroto amana ma alona ina netawanei*

<sup>8</sup> *ma awana maiteni ina vitagogi* da tau i eġa ruaġa me au naona ma tupua tagogi.

<sup>9</sup> God aiwai i vitagogiei, eġa aiai ina vilamonei.”

<sup>10</sup> Maranai tau i naeme au numa, ma tauvotaġotaġo, Iesu i vitara-virevirei wei kauai aubaii.

<sup>11</sup> Iesu i paribelei, “Mepa da oroto, awana i voterei. Ma wavine ġelauna i ravaġi. Lamna tauna, awana awarina i rauiviapoapoe.

<sup>12</sup> Ma nanarena mepa da wavine, awana i voterei ma oroto ġelauna i ravaġi. Lamna awana, awarina i rauiviapoapoe.”

### *Iesu, roaroa i viaiaini*

<sup>13</sup> Rava ġelau, roaroa i nei i Iesu awarina da urana au tepai ita terei. Ma ana tauvotaġotaġo, ravai i viġaei.

<sup>14</sup> Maranai Iesu wei kauai i ’nanai. Ma ana tauvotaġotaġo i eni ma i riwa, “Roaroa ona voterei da awariu ina nei. Ma eġa ona viġaei. Au baina God ana vigulau, lamna rava wenanare aubai me wei roaroai.

<sup>15</sup> A ririwana-kauemi. Aiai, God ana vigulau eġa ina vaia me tevera aburuna nanare. Tauna, eġa God ana au vigulau ina rui.”

16 Ma roaroa i taravaini ma i rapai, urana au tepai i terei, i raupari ma i viaiaini.

*Purapura ravana*

*(Matthew 19:16-30; Luke 18:18-30)*

17 Ma maranai Iesu i vomairi da i nenaē. Orotō i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kauēi da lawana maemaē-nonoana ana vibuderiei?”

18 Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana.

19 ✧Tam, God ana Tarawatu u aramaneī, *Eġa ma viragēna! Eġa ma awadanene! Eġa ma danene! Eġa ma viwavu-moru! Eġa ma amkwalakwala! Amam ma Alom ma vivirei!*”

20 Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

21 Iesu, tauna i ’nanai ma i vinuavainei ma i riwei, “Kaua tagogi e mamae eġa uta kaukauei. Ma nae ma am purapura anatapuna ma gimareī. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaġotaġoiu!”

22 Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

23 Iesu i ’nana viravira ma ana tauvotaġotaġo awari i riwa, “I piripiri kaua da purapura ravana, God ana au vigulau ina rui.”

24 Tauvotaġotaġo riwana i baiei maranai Iesu we-nanare i babani. Ma Iesu i riwa me, “Natunatu!

---

✧ 10:19: Exo 20:13; Exo 20:14; Exo 20:15; Exo 20:16; Exo 20:12

I piripiri kauga da purapura ravana,\* God ana au vigulau ina rui.

<sup>25</sup> I telatela kauga da ḡamoḡamo ḡaeḡaena wavana kamel, iḡoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

<sup>26</sup> Tau i vinuanaina ma ai nota i kwa. Ma tau avai i babani vivira i pa, “Mepa da nanare; amapo aiai lawana mamae-nonoana ina vaia?”†

<sup>27</sup> Iesu awarii i 'nana ma i riwei, “Rava awarii wei kauai i piripiri. Wate eḡa God awarina. God awarina aiwai anataputa i telatela kauga.”

<sup>28</sup> Ma Peter i riwei, “Ma tauai menanare? Tauai ai purapura a voterei ma tam a votaḡoim.”‡

<sup>29</sup> Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaḡotaḡoiu; tau ma Riwana Aiaina aubaina.

<sup>30</sup> Tauna ana maia ina rata kauga wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anataputa ina maḡa. Rava ina rau-iviapoapoelem; aubaina tam, tau au Tauvotaḡotaḡo da mara au murina tauna lawana mamae-nonoana ina vaia.

<sup>31</sup> Wate maḡamaḡai marina e vivinao; tau i ina vimuri. Ma maḡamaḡai da e vivimuri; ina vinao.”

---

\* **10:24:** Wei riwana buka ḡelau awarii e mamae ma ḡelau eḡa *purapura ravana*. † **10:26:** Mai Jew i notai da rava vipurapurai lamna BADA ana verena ana nuavaina matairana, tau i e notai da BADA, rava vipurapurai eḡa ina gagaloei, tauna ravai ḡelau maiteni eḡa ina gagaloei. ‡ **10:28:** Peter i ḡoei da ita aramanei da tauvotaḡotaḡo ai au iraḡe maiana aiwai, ina vaia.

*Iesu ana iragē babanina i vitonui  
(Matthew 20:17-19; Luke 18:31-33)*

<sup>32</sup> Iesu, ana tauvotaḡotaḡo maiteni i ḡeḡae au Jerusalem. Iesu, tauī au naoi i nēnae. Tauvotaḡotaḡo i baiei. Ma rava ḡelauī au muri i nēnei i rovo kaua. § Ma tauī 12 i rauḡorei au ririva ma i raukarei da kaua amapo da awarina ina tupua; tauī i vieḡei

<sup>33</sup> I pa, “Ona inana, tauta ta ḡeḡae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tauī ana iragē ina vianinei. Ma Mai Jentail ina verei.

<sup>34</sup> Ma tauna ina vijiboḡi ma ina ovai ma ina kwapui ma ina viraḡeni. Au pom vitonuina ina vomairi me.”

*James ma John ai vibaḡa  
(Matthew 20:20-28)*

<sup>35</sup> - Zebedi natunatuna James ma John i nei Iesu awarina ma i vibaḡai i pa, “Tauviararamana! Tauai ai ḡoana a vivibaḡei uta kauei.”

<sup>36</sup> Iesu i riwa i pa, “Aiwai o ḡoeḡoei ana kauei aubaimi?”

<sup>37</sup> Tauī i paribelana, “Ma verelai da ana kiala, tagogi au oiem ma ḡelauna au kelakelaum am au vigulau.”

<sup>38</sup> Iesu i paribelei, “Taumi eḡa ota aramanei aiwai o vivibaḡei! Iniviara kelakana ana umai. Taumi

---

§ **10:32:** *Iesu i ḡeḡae au Jerusalem* ma rava maḡamaḡauī i viḡaviei ma lamna aubaina ana tauvotaḡotaḡo i baiei da tauna tepana i tora da weka i nēnae. Rava ḡelauī i votaḡotaḡo, tauī i rovo kaua da aiwai awarina ina tupua maranai i ḡeta au *Jerusalem*.

tagotagogina da ona umai bo? Tagotagogina ona babataito me tau ina babataitoui?\*

<sup>39</sup> I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraḡe me tau ana iraḡe.

<sup>40</sup> Wate tau au rewapana eḡa ita mamae da ana veremi da mepa ona kiala au oieu bo au kelakelau. God, rava i vinevinei; tau i ai gabu i vokaukauei.”

<sup>41</sup> Maranai Tauvotaḡotaḡo 10 ḡelau, wei riwana i nonori. Tau James ma John awarii i ḡaiawa.

<sup>42</sup> Ma Iesu, tau i anatapui i ḡorei da awarina ma i riwei, “O aramanei da jentail ai babada, dobu ḡela ravai jentail awarii e mamae-ḡaeḡae ma e rarauiviapoapelei. Wate tau i ai babada ḡaeḡaei, ai rewapana i ḡetelera da ai rava e vibadebadei da ai ḡoana e kaukauei.

<sup>43</sup> ✧ Wate au tauvotaḡotaḡo eḡa nanare. Eḡa da aiai i ḡoei da ina ḡetelera taumi au poumi; tauna anina da ina vitaunola.

<sup>44</sup> Aiai i ḡoei da ita vinoa. Tauna ina vitaunola rava anatapui aubai.

<sup>45</sup> Ma nanare Rava Natuna eḡa ita nei da tauna, tana nolei. Wate ita vitaunola rava aubai. Ma ana lawana ita verenei da rava maḡamaḡai ai lawana ita gimara-melei.”†

*Iesu, rava mata-potapotana Batimeus i vilawani  
(Luke 18:35-43)*

---

\* **10:38:** ...babataito me tau ina babataitoui tau i iniviara ma iraḡe e bababaniei, maranai Iesu au Gethsemani i raraupari muriai da ana iraḡe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaḡai. ✧ **10:43:** Mrk 9:35  
† **10:45:** Iesu i vinuapoapoe ma iraḡe aubaita me Isaiah i girugirumia nanare au Isa 52:13-53:12.

46 Ma tauī i ġeta au Jeriko. Iesu, ana tauvotaġotaġo, patara ġaeġaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana.

47 Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapoeleu!”‡

48 Rava maġamaġau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

49 Iesu i tumairi ma i pa, “Ona ġoreiai!”

Anina tauī, mata-potapotana i ġoreiai i pa, “Tepam ina tora ma ma vomairi! E ġoreġorem!”

50 Tauna, ana puru i tawanei ma i vomairi laġilaġina ma i nei Iesu awarina.

51 Iesu i paridadana i pa, “Aiwai u ġoei ana kauei aubaim?”

Mata-potapotana i paribelei, “Tauviararamana! A ġoei da ana inana me.”

52 Iesu i riwa, “Ma nae! Am tumaġana i vilawanim.” Maratagogi tauna i ’nana me ma Iesu au eta i votaġotaġoi.

## 11

### *Iesu i rui au Jerusalem*

(*Matthew 21:1-11; Luke 19:28-40; John 12:12-19*)

---

‡ **10:47:** Maranai oroto mata-potapotana Iesu i kwatuei *David natuna* ma mai Jew i aramanei *Keriso - BADA ana vinevine* i babaniei. Mai Jew i aramanei da *Keriso* ai wavalatona me David wariaġa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)



1 Ma maranai Jerusalem i tuḡereḡerei ma i rui au Betphagi ma Bethani\* au ola *Olives*. Ma ana tauvotaḡotaḡo ruaḡa i paritawanei,

2 ma i riwei i pa, “Ona nae au melagai au naomi. Maranai o ruirui, kampa *donki* natuna ḡaubo, raḡiraḡitana ona nelaḡai. Tauna eḡa aiai ita geru-dadanei. Ona rupeni ma ona neiai.†

3 Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ḡoeḡoei ma maratagogi ina paritawana-melei.”

4 Ma i nae ma *donki* ḡaubona au doa au metaeta raḡiraḡitana i rupeni.

5 Rava ḡelau kampa i maimairi i paridadana i pa, “Aiwai o kaukauei *donki* ḡaubona o ruperupeni?”

6 Ma i paribelei me Iesu i ririweia nanare ma tau i voterei da i nae.

7 Tau *donki* i neiai Iesu awarina ma ai puru au uporana i tawana-epai ma au tepana Iesu i kiala.

8 Ma rava maḡamaḡai, ai puru au eta i ebani ma ḡelau, ai rugurugu i tarataraia i ebani.

9 Tau i vivinao ma tau au muri i nenei i garara:

“Hosanna!”‡

“Viviaiainana tauna BADA au wavana e nenei!”

10 “Viviaiainana amata David ana vigulau e nenei!”

“*Hosanna* au aidamo telarana!”

---

\* **11:1:** Eng. *Bethphage & Bethani*. † **11:2:** Mai Jew awari, *donki lamna nola aubaina ma eḡa gulau ana anigeru. Donki i gerui lamna e ririweta da tauna gulau ana nuaubana ma vilamolamonana i nei.* ‡ **11:9:** Lamna pona Aram anona ma vilawaniai ma muriai lamna viegualau ma vimae-ḡaeḡaena aubaina.

<sup>11</sup> Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, tau i 12 maiteni.

*Iesu, damala aina i parivai-irairaġeni  
(Matthew 21:18-19)*

<sup>12</sup> Ma marana i tom, tau i Bethani i opu-tawanei ma Iesu am-iraġe.

<sup>13</sup> Au weia ma damala aina i 'nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara.

<sup>14</sup> Iesu, damala aina i riwei i pa, "Eġa aiai amadodo ma amapo anom ina am-melei!" Ma ana tauvotaġotaġo i nonori aiwai i latoni.

*Iesu, taugimara tempolei i viaġaġana-opunei  
(Matthew 21:12-17; Luke 19:45-48; John 2:13-22)*

<sup>15</sup> Maranai tau i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina§ ai kepa kepa ma gabubu taugimareina ai anikiala i vitauvirai.

<sup>16</sup> Ma i viġaei da eġa aiai ana gimara Tempol au orana ita avarai-naiei.

<sup>17</sup> \*Ma rava i viararamani i pa, "I girugirumia nanare,

'Au numa ina ġorei pari numana  
dam anatapu i au dobu aubaii.'

---

§ 11:15: Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). \* 11:17: Isa 56:7

Wate taumi o vovirai da kwalakwalai ai guba.”\*

<sup>18</sup> Pirisi Babadai ma tarawatu Babadai i nonori ma i ogei da ita viraḡeni. Tauī, Iesu i roveoi aubaina patara ana viararamana i baiei.

<sup>19</sup> Ma au bigai Iesu ana rava, Jerusalem i opu-tawanei.

*Damala aina i poi*

*(Matthew 21:20-22)*

<sup>20</sup> Ma ubaubanai tauī i nenaē ma damala aina i ’nanai anatapuna i poi.

<sup>21</sup> Peter i notai ma i riwa “Tauviararamana ma inana! Damala aina u parivai-irairaḡenia i poi.”

<sup>22</sup> Iesu i paribelei, “God ona vitumaḡanei!

<sup>23</sup> A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eḡa ina raḡaraḡa ma ina vitumaḡana da aiwai e ririweia, ina tupua.

<sup>24</sup> Lamna aubaina a ririwemi. Aiwai ami au pari o vibaḡei, ona vitumaḡana da taumi boiboḡi o vaia ma ina viḡarimiei.

<sup>25</sup> Ma maranai e raraupari, au naona rava anatapui ai ḡo’apoapoe awarim ma nota-tawanei. Ma nanare amam au mara am ḡo’apoapoe ina nota-tawanei.”†

*Jew babadai, Iesu ana vibadana i vitarapiriei*

*(Matthew 21:23-27; Luke 20:1-8)*

---

\* **11:17:** Iesu dobuḡela manena tauviraina ma gimara ravai i viwavui da tauī pari numana i vovirai da amkwalakwalai ai guba, tauī rava ai arua nolana e viviapoapoeni Jer 7:11-15. † **11:25:** Riwa wadubo nonoana uraiei i girugirumia vs 26 weka eḡa ita mamae, *Mepa da rava ai apoapoei eḡa ma nota-tawanei, amam au mara nanare am apoapoei eḡa ina nota-tawanei.*

27 Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

28 Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauai?”

29 Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei.

30 Aiai, John taubabataito vibadana i verei da rava ita babataitoi, God bo rava? Ona riweu!”

31 Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eġa ota vitumaġanei?’

32 Wate eġa tana riwa da, ‘Ravei.’ Tau rava i rovoei, aubaina rava anatapui, ai nota da John anina peroveta.

33 Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

## 12

### *Tauipi ai awanaina*

*(Matthew 21:33-46; Luke 20:9-19)*

1 ✨Iesu i vikarei ma awanainei awari i babani i pa, “Mara tagogi oroto, ana wapu i kauai ma grape i paewi\* ma i gari ma grape anigudana ma violaġa numana i voai. Ma tauipi ġelau i verei da ita nolei tau anatapui aubai. Ma i vaġai au dobu ġela.

✨ 12:1: Isa 5:1-2

\* 12:1: Parivainota wadubona, God au anatapuna Israel e bababaniei me tauna ana grape wapuna, me Isa 5:1-2.

<sup>2</sup> Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia.

<sup>3</sup> Wate tauipi, tauna i vojijini ma i kwapui ma kwakwavina i paritawanei.

<sup>4</sup> Ma taniwaga, taunola ġelauna i paritawanei. Ma tau, kolana i viaibauni ma i vitepaubaubai.

<sup>5</sup> Ma taunola ġelauna i paritawanei ma tauna i viraġeni ma imaġa ġelau i paritawanei, ġelau i kwapui ma ġelau i viraġeni.

<sup>6</sup> Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Tau, natu ina vivirei.’

<sup>7</sup> Wate tau, tauna i ’nanai ma i riwa vivira i pa, ‘Wei taniwaga natuna. Ona nei, tana viraġeni ma ana buderi ina viġaritaiei!’

<sup>8</sup> Ma i vunui ma i viraġeni ma tupuana wapuei i tawanana-opunei.

<sup>9</sup> –Wapu taniwagana marina aiwai ina kau ei tau awarii? Tauna ina nei ma tauipi ina viraġeni ma grape wapuna ina veredamanei tauipi ġelau awari.

<sup>10</sup> Wei girumana o iavi bo eġa?

*‘Wei ġaimana, tauvoa i geduaiei,  
wate muriai i nelaġai da tauna ġaima kaua.*

<sup>11</sup> *Wei lamna, BADA ana kaua  
ma inanana i vinualaulauna.” (Psalm 118:22-23)*

<sup>12</sup> Jew babadai i aramanei da awanaina lamna tau i bababaniei ma i ġoei da ita pani. Wate tau patara i rovoei, lamna aubaina Iesu i voterei ma i nae.

*Caesar awarina tax tana terei bo eḡa?  
(Matthew 22:15-22; Luke 20:20-26)*

<sup>13</sup> Ma Pharisi ḡelau i ma Herod ana rava ḡelau i nae Iesu awarina da riwei ita waroi.

<sup>14</sup> Tau i nei ma i riwa, “Tauviararamana, tauai aramanei da tam rava jijimanim. Ma rava wavai naenaei ma rava labalababa eḡa uta vibainaenaei ma anatapui e vaivaia da tagogi. Wate tam God ana babani riwa kau ei e viararamani. Ma riwelai tax tana terei Rome gulauna wavana Caesar† awarina, i aii bo eḡa?”

<sup>15</sup> Wate Iesu, ai moru i ’nana-bauni ma i riwei, “Aiwai aubaina o raudadaniu? Mani tagogi ona neiai da ana inanai!”

<sup>16</sup> Denarius tagogi i neiai Iesu awarina ma tau i vitara-virevirei, “Wei aiai aruana ma wavana?”

I paribelei, “Caesar.”

<sup>17</sup> Iesu i riwa, “Aiwai Caesar ḡarinei, Caesar ona verei. Ma aiwai God ḡarinei, God ona verei!” Ma tau i baiei.

*Sadusi ḡelau, Iesu i vitara-virevirei irairaḡelei vo-  
mairina aubaina*

*(Matthew 22:23-33; Luke 20:27-40)*

<sup>18</sup> ☆Mai Sadusi ai vitumaḡana da rava eḡa ita vovomairi-me maranai e irairaḡe.‡ Anina ma ḡelau i nei Iesu awarina ma i paridadanei,

---

† **12:14:** Sisa. ☆ **12:18:** Act 23:8 ‡ **12:18:** Sadusi tau i gulagulau ma rava ḡaeḡaei mai Jew ai giu babadai tau i maiteni eḡa ita vitumaḡana da *anela* bo arua ḡelau e mamae ma buka 5 i vinoa, Moses i girugirumia, tau i lamna ava e vivitumaḡanei (Karena, Exodus, Leviticus, Numbers, Deuteronomy). Ma eḡa buka ḡelau. Wate Moses ma BADA riwaiei tau i viatataiei da lawana e mamae iraḡe au murina.

19 “Tauviararamana! God ana tarawatu, Moses wenanare i girumi: Mepa da oroto i’raġe ma kaiababana i netawanei ma eġa natunatui. Orotovareina kaiababana ina ravaġi ma roaroa ina ġuni vareina aubaina.

20 Mara tagogi varevarei seven i mae. Ma natuevou i tavine ma eġa natunatuna ma oroto i’raġe.

21 Vareina viruaina kaiababa i ravaġi ma tauna maiteni eġa natuna ma i’raġe. Ma nanare vareina vitonuina.

22 Ma nanare anatapui seven, wavinena i ravaġi ma eġa natunatui. Au muriai wavine i’raġe.

23 Anatapui seven, wavinena i ravaġi. Vomairi me au marana, lamna aiai awana?”

24 Iesu, tau i riwei, “Aiwai Moses i girumi ma God ana rewapana eġa ota aramanei.

25 Maranai tau i raġelei ina vomairi, tau i eġa ina tavine bo ina vitavinei. Wate ina mae me anela au mara.

26 ✧ Ma rava i raġelei ai vomairi babanina, Moses ana tarawatu eġa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.*

27 Tauna eġa rava irairaġei ai God, wate rava lawalawai ai God. Taumi o moru kaua!§”

### *Tarawatu ġeġetelarana*

*(Matthew 22:34-40; Luke 10:25-28)*

28 Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua,

---

✧ 12:26: Exo 3:6 § 12:27: ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau i lawalawai maranai BADA, Moses awarina i babani.

lamna aubaina tauna i vitara-viravira, “God ana tarawatu metauna i ġetelara?”

29 ✧ Iesu i paribelei, “Ġeġetelarana tagogi lamna wei: *Ona rautaniġana Israel! BADA ata God, tauna ava BADA.*

30 BADA *ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei!*

31 ✧ Ma viruaina lamna wei: *Rava ġelau nuanuam ina vaia me tam nuanuam e vaivai-melei! Wei tarawatui ruaġa i ġetelara, eġa me ġelau nanare.”*

32 Tarawatu badana i riwa, “Tauviararamana u babani kauga! Riwa kauga u babaniei, BADA *Tauna ava God ma eġa mepa ġelauna.*

33 Ma *nuanuami ina vaia orami anatapunei ma ami nota anatapunei ma ami rewapana anatapunei.* Ma, *Rava turam nuanuam ina vaia me tam nuanuam e vaivai-melei.* Wei tarawatui ruaġa lamna i ġetelara, eġa me pulo apuapunana bo pulo ġelau.”

34 Iesu i ’nanai da tauna i paribelana kauga ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

### *Keriso tauna aiai?*

*(Matthew 22:41-46; Luke 20:41-44)*

35 Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?”

36 ✧ Arua Vivivireina, David nota i verei ma tauna i riwa:

*‘MAMAE-NONOANA au gulau i riwei,  
Au oieu ma kiala*



*da am ġavia  
au ae karem da ma tuvaidoedoei' (Psalm  
110:1)*

<sup>37</sup> —David, tauoina wei gulauna i ġorei *bada*.  
Ma menanare da badana lamna, David natuna?"  
Patara ġaeġaena riwana i nonori ma i vinuaiai.

*Iesu, Tarawatu Babadai ai kaua i babaniei  
(Matthew 23:1-36; Luke 20:45-47)*

<sup>38</sup> Ma Iesu, tau i viararamani i pa, "Tarawatu  
babadai ona rovoei. Ai gara manamanai ma  
e bababara nae au deba da rava tau i e vivivirei.

<sup>39</sup> Tau i anikiala vinevinei pari au numana ma  
au torela, gabu ai i e vaivaia.

<sup>40</sup> Tau i, kaikaiababa e morumoru ma ai  
numa e kwalekwalei, e morumoru ma e raraupari-  
vai-manamanawa. Tau i ai kovoġa ina apoapoe  
guratana."

*Kaiababa ana pulo  
(Luke 21:1-4)*

<sup>41</sup> Ma Iesu, pulo aniterenana au baba ġelauna  
i kiala ma rava i 'nananai mane i tereterei. Rava  
maġamaġau i vivimanei, mane maġamaġau i terei.

<sup>42</sup> Wate kaiababa molamolakana i nei ma mane  
muomuoi ruaġa i terei, ruvana i aburu kaua.

<sup>43</sup> Ana tauvotaġotaġo i ġorei ma i riwei, "An-  
ina a ririwemi, wei kaiababa molamolakana i tere-  
guratei, eġa me tau i ġelau i.

<sup>44</sup> Tau i ġelau i ai maurei i verena, wate wei ka-  
iababa molaka ma ġarinei anatapuna i terei, ana  
anilawana anatapuna."

# 13

*Iesu i riwa da rava God ana Tempol ina rikai  
(Matthew 24:1-2; Luke 21:5-6)*

<sup>1</sup> Iesu, Tempol i nene-tawanei ma ana tauvotaḡotaḡo tagogi i riwa, “Tauviararamana! Numa i viḡulau ḡaḡa ma numa ḡaimai i rata ḡaḡa.”

<sup>2</sup> Iesu i paribelei, “Wei numai ḡaeḡaei u inanai, eḡa ḡaimai tagogi, turana au tepana ina mae. Ḣaima anapui ina rikai.”

*Rava ina vinuapoapoe kaua. Iesu ana tauvotaḡotaḡo ina vipatutu  
(Matthew 24:3-14; Luke 21:7-19)*

<sup>3</sup> Iesu i kiakiala au ola *Olives*, Tempol au nanavaḡela ma Peter, James, John ma Andrew i nei ma i vitaraviravirana govaḡei

<sup>4</sup> i pa, “Ma riwelai mara aiwai wei kauai ina tupua? Ma aiwai ina vimataira da wei kauai anapui ina tupua?”

<sup>5</sup> Iesu, tau i riwei, “Ona inana kaua da eḡa aiai ina terevaideḡaimi!

<sup>6</sup> Rava maḡamaḡai, wavauei ina nei ma ina riwa, ‘Tau Keriso tauvilawana!’ Ma rava maḡamaḡai ina terevaideḡai.

<sup>7</sup> Ma maranai viḡavia ona nonori ma viḡavia aueia riwana ona nonori; eḡa ona rovo! Wei kauai anina da ina tupua, wate wei eḡa damona.

<sup>8</sup> Dam, damai ina viḡavia vivira ma dobu, dobuai ina viḡavia vivira. Ma lolo ma gomara dobu au anapuna. Wei kauai, lamna me wavine ana iniviarā e vivikarei maranai e vivinatuna.

<sup>9</sup> —Ona inana kaua! Taumi ina panimi ma ina etaremi ma pari numana au orana

ina kwapuimi. Ma gavena ma gugulau au naoi ona mairi, aubaina taumi o votaḡotaḡoiu. Ma tau awarii, Riwa Aiaina ona raugugulei.

<sup>10</sup> Riwana Aiaina ona raugugulei rava anatapui awari ma muriai damona ina nei.

<sup>11</sup> Ma maranai i panimi ma i etaremi. Eḡa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eḡa taumi ota babani, wate Arua Vivivireina.

<sup>12</sup> Rava, vareina ina verenei da ina viraḡeni. Ma ama, natunatuna ina verenei da ina viraḡeni. Ma roaroa, amamai ma aloloi ina viḡaviei da ina iraḡe.

<sup>13</sup> Rava anatapui ina geduaiemi tau aubaiu. Wate aiai da e maimairi-jijina da au damona, tauna ina lawana.”

*Iniviarā ḡaeḡaena ana mara*

*(Matthew 24:15-28; Luke 21:20-24)*

<sup>14</sup> “Maranai ‘Kaua apoapoe kaukauana’\* e maimairi mepa avena ita mairi. (Buka tauivavana wei ina aramanei anona aiwai). Tai aiavo au Judea ina ruba laḡilaḡina au ola.

<sup>15</sup> Aiai numa au tepana eḡa ina ḡaira bo ina rui au numa da aiwai ina vaia.

<sup>16</sup> Aiai au wapu eḡa ina naeme au numa da ana gara ina vaia.

<sup>17</sup> Ma iniviarā ḡaeḡaena, waivine duaduamai ma tau da e viviḡuḡu awari nai au marana!

<sup>18</sup> God awarina ona raupari da wei kauai eḡa au bodu ina tupua.

---

\* **13:14:** Eng. *Abomination of Desolation* Dan 9:27 11:31 & 12:11

19 ✨Ma nai au marana amapo iniviara gāeḡaena. Ma maranai God dobu i kauēi, iniviara gāeḡaena eḡa nanare ita tupua ma amapo eḡa nanare ina tupua me.

20 Wate BADA nai marana ina vitupoi. Mepa da eḡa ina vitupoi, rava anatapui ina iraḡe. Wate rava, tauna ana vinevine ina vilawani lamna aubaina mara ina vitupoi.

21-22 —Muriai keriso tauvilawana morumorui ma peroveta morumorui ina nei ma mataira ma kaua babai ina kauēi ma ina kauana dadanei da God ana vinevine maiteni ita terevaideḡai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eḡa ona vitumaḡanei!

23 Ona inana kaua; anatapuna a riwana-nonoemi!”

*Rava Natuna ana nei  
(Matthew 24:29-31; Luke 21:25-28)*

24 Iesu wenanare i riwa, “Ma iniviara gāeḡaena au murina.

*Madēḡa eḡa ina rarana  
ma nawaravi eḡa ina lalai. (Isaiah 13:10)*

25 *Ma ubona marei ina peu  
ma rewapana ḡelauī au aidamo ina gui. (Isaiah 34:4)*

26 ✨—Nai maranaina, *Rava Natuna ana rewapanana ma ana borumana apauei ina nei.*

27 Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ḡela au damona.”

*Damala ana awanaina  
(Matthew 24:32-35; Luke 21:29-33)*

28 “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai.

29 Ma nanare, maranai wei kauai anapui ina tuputupua, ona aramanei da Rava Natuna i turiai; au metaeta i ġetai.

30 Anina a ririwemi da wei kauai au naona ina tupua ma muriai da rava marina lawalawaii ina iraġe.

31 Mara ma dobu ina amoa. Wate riwau eġa ina amoa.”

*Bada ainelana ana nei i aramanei  
(Matthew 24:36-44)*

32 “Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei.

33 Ona vineneġana ma matami ina kala!† Eġa ota aramanei mara aiwai, wei kauai ina tupua.

34 Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauai. Ma tauvineneġana i riwei da ita vineneġana.

35 Ona vineneġana! Eġa ota aramanei mara aiwai, numa taniwagana e nenei; mepa da au bigai bo au nubautuva bo maratomtomai bo ubaubanai.

36 Ma eġa matamatavemi ina nelaġaimi.

37 Aiwai riwana a ririwemi, riwana tagogina rava anapui a riwei, ona vineneġana!”

---

† **13:33:** Wedau *Evangelia* i girumi, *ma i raupari*, wate buka wadubo nonoana wei eġa ita mamae, Luk 21:16 kampa ona inanai da e mamae.

# 14

*Jew ai babada, Iesu i ogei da ita viragēni  
(Matthew 26:1-5; Luke 22:1-2; John 11:45-53)*

<sup>1</sup> ☆ Au pom ruaḡa muriai da Raḡona ma Palawa Bagibagina torelai,\* Pirisi babadai ma Tarawatu Babadai eta i baibaiei da menanare govagovaḡanei Iesu ita vunui.

<sup>2</sup> Ma i riwa, “Au torela wei kauai eḡa tana kauēi, mēpa da viḡaiḡaiawa ḡaeḡaena ina tupua.”

*Wavine, daji ḡabuḡabuna Iesu au kolana i waḡi  
(Matthew 26:6-13; John 12:1-8)*

<sup>3</sup> Maranai Iesu au Bethani, Simon i ḡoreḡorei lepeleperana ana au numa i kiala ma i amam. Wavine, wagi wavana alabaster i voai ma i ḡeta ma wagi uana i vogai ma daji ḡabuḡabuna, maiana ḡaeḡaena e ḡoreḡorei *nard*, Iesu au kolana i waḡi.

<sup>4</sup> Rava ḡelau i kampa i mamae i ḡaiawa ma i riwa, “Aiwai aubaina daji u vikalokaloei?”

<sup>5</sup> Wei dajina ita gimarei 300 *denarii* † ruvana ma manena molamolakai ita verei.” Ma tauī, wavine i vienēni.

<sup>6</sup> Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awariu i kauēi.

<sup>7</sup> Molamolakai awarimi e mamae-nonoa ma ona ḡoei ma tauī ona voagui. Wate tau awarimi eḡa āta mamae-nonoa.

<sup>8</sup> Wavine ana nola i kauēi. Tauna, dajiei tupuau i vokaukauana-nonoei vikokoaga aubaina.‡

---

☆ **14:1:** Exo 12:1-27      \* **14:1:** *Raḡona (passover)* Exo 12:1 *Palawa eḡayist maiteni (Unleavened-Bread)* Exo 12:17 & 23:15      † **14:5:** Wei lamna me taubagibagi ana maia madeḡa tagogi aubaina.      ‡ **14:8:** Mai Jew ai kaua da taubeu dajiei e bulobuloī muriai au kokoaga e tereterei.

9 A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eġa nuanuai ina vuru.”

10 Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei.

11 Tau i vinuaii kua maranai wei i nonori ma Judas i parivainuaġani da mane ita verei. Ma Judas i 'nana da mepa gavogavo ita inanai da Iesu ita amverenei.

*Iesu ma Apasol, Raġona torelana i ani.*

*(Matthew 26:17-25; Luke 22:7-14, 21-23; John 13:21-30)*

12 Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukauei aubaim?”

13 Iesu, tau i ruaġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi.

14 Au numana e ruiruiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?”

15 “Ma tauna, numa vatavatarana ina viatataiemi i vokaukauana-nonoei ma kampa aubaita ona vokaukaua.”

16 Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

17 Au i biga ma Iesu i nei Apasol maiteni.

18 Taui au kepacepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

19 Tauvotaḡotaḡo i vinuabola ma tagotagogi ava i pa, “Eḡa tau tapa?”

20 Iesu i paribelei, “Taumi tagogi weka palawa e vivigaloi au aboma tau maiteni.

21 Wariaḡa i girugirumia nanare, Rava Natuna ina iraḡe. Wate ai ai da Rava Natuna i vibenabenamei; tauna, kovoḡa ḡaeḡaena ina vaia! I aii da alona avena ita vinatunei.”

22 Maranai i amam ma Iesu palawa i vaia ma i viegualau, i vogimagimai ma Tauvotaḡotaḡo i verei ma i riwa, “Ona vaia; wei tupuau.”

23 Anina ma *wine* kelakana i vaia ma i viegualau ma i verei da anatapui i umei,

24 ✨“Wei tau tarau i toi rava maḡamaḡau aubai ma au parivainuaḡana bagibagina ina vovai-virewapani.

25 Anina a ririwemi, *wine* eḡa ana uma-melei da maranai God ana rava aubai ana vigulau.”

26 Ma taui voepaepa welana i ravi ma i ḡae au Ola *Olives*.

*Peter, Iesu ina boviei  
(Matthew 26:31-35; Luke 22:31-34; John 13:36-38)*

27 Iesu, taui i riwei “I girumi nanare, God i riwa, ‘*Tauviḡamoḡamo ana viraḡeni ma sipu ina vilamonei.*’ (Zekariah 13:7)

Ma nanare anatapumi ona ruba-tawaneu.

28 Wate au vomairi au murina ana aivinao au Galili.”

---

✨ 14:24: Exo 24:8; Jer 31:31-34



29 Peter i riwa, “Mepa da anatapui ina rubatawanem, wate eġa tau!”

30 Iesu, Peter i riwei, “A ririwana-kauem da amadodo waguvarai muriai da kokorereko ina tou mara ruaġa; tam mara tonuġa ma boviu.”

31 Wate Peter, ponana i bagibagi ma i riwa, “Avena mepa da tau, tam maiteni ana iraġe. Eġa melanai ana boviem!” Ma tau i ġelau i riwana tagogina i latoni.

*Iesu au Gethsemani i raraupari  
(Matthew 26:36-46; Luke 22:39-46)*

32 Ma au Gethsemani i ġeta ma Iesu, ana tau-votaġotaġo i riwei, “Weka ona kiala ma ana raupari.”

33 Ma Peter, James ma John i taravaini ma nuanuana i raġe ma nuanuana i bola-kauei.

34 Ma tau i riwei, “Au nuabola i rata kua au orau da e vunuvunuiu. Weka ona mae ma ona vineneġana.”

35 Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei.

36 I riwa i pa, “*Abba* Amau! Aiwai anatapuna tagotagogina tam awarim. Wei kovoġa kelakana ma vaitawanei. Wate eġa tau au ġoana, wate tam am ġoana.”

37 Ma Iesu i nememei ma tau i tonuġa rarau-nuavurui i nelaġai. Ma Peter i riwei, “Simon!§ tam aiwai matavena? Mara aburuna uta vineneġana bo eġa?”

---

§ 14:37: Au Mrk 3:16 *Simon* wavana i virai da *Peter*.

38 Ma Iesu, tau i riwei, “Ona vineneḡana ma ona raupari da eḡa au raelara ona peu! Arua e ḡoeḡoei, wate tupua i ḡokokokara.”

39 Ma i naeme ma parina tagogina i raupariei.

40 Maranai i nememei ma i nelaḡai, i matamatave; tau, matai i vitai. Ma tau eḡa ita aramanei aiwai ita riwei.

41 Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ḡetai, ona inanai. Rava Natuna ina vibenabenamei ḡo’apoapoe ravai au urai.

42 Ona vomairi; tana nae; ona inana! Tauvibenabenameu e nenei!”

*Iesu i pani*

*(Matthew 26:47-56; Luke 22:47-53; John 18:3-12)*

43 Iesu i bababani ma Judas, tauna ana Tauvotaḡotaḡo tagogi i ḡetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai.

44 Muriai da Iesu awarina ita ḡeta; Judas, patara ai mataira i verei, “Orotona ana vigia laḡolaḡonei; nai tauna. Ona pani ma ona naiei ma ona inana-kauei!”

45 Maranai Judas i ḡeta ma i nae Iesu awarina ma i riwei, “Tauviararamana!” Ma i vigia-laḡolaḡonei.

46 Ma tau, Iesu i vojijini ma i pani.

47 Ma tagogi kampa i maimairi, ana sword i tainalavui ma Pirisi ḡeḡetelarana ana taunola taniḡana i borituini.

48 Ma Iesu, tau i riwei, “Taumi ana apiami o nei da ota panu bo, apamina tau amkwalakwalau?”

49 Marana patapatai taumi maiteni ta mamae au Tempol ma a viaramana ma eġa ota paniu. Ma i girugirumia nanare, ina tupua.”

50 Ma Tauvotaġotaġo anapui, Iesu i voterei ma i ruba-tawanei.

51 Ma laraga tagogi, i vikareko ma Iesu i votaġotaġoi. Tau i ġoei da ita vojijini,

52 wate ana kareko i vojijini ma tauna ana kovakovana i ruba.

*Tau, Iesu i etarei.*

*(Matthew 26:57-68; Luke 22:54-55, 63-71; John 18:13-14, 19-24)*

53 Ma tau, Iesu i naiei Pirisi Ġeġetlarana. Pirisi Babadai, dogadogara ma Tarawatu Babadai mepa i vitagogieiana.

54 Ma Peter i votaġotaġo da Pirisi Ġeġetlarana ana numa. Ma ana au debadeba, purusimani maiteni i kiala ma i viviairara.

55 Pirisi Babadai ma mai Jew ai boru ġeġetlarana,\* Iesu ana apoapoe i baiei da ita viraġeni; ma i baiana-avei.

56 Matamata maġamaġau, Iesu i viwavu-morumoruei, wate ai viwavu taputapunei ava.

57 Ma ġelau i vomairi ma wei wavuna morumoruna i kauei Iesu awarina,

58 “Tauai a nonori tauna i riwa, ‘Wei tempolna i voavoai. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.”

59 Wate nanare ai viwavu taputapunei ava.

---

\* 14:55: Mai Jew e ġoreġorei *Sanhedrin*.

60 Pirisi ġeġetelarana i mairi tau i au naoi ma Iesu i vitara-virevirei, “Wei ravai e viviwavuim ma eġa ai-wai ma paribelei bo?”

61 Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaianana Natuna bo?”

62 ✨Iesu i paribelana, “Tau tauna! Ma *Rava Natuna ona inanei, Vivirewapanana au oiena ina kiala ma mara ladanei ina nei.*

63 Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelau tana ġoei?”

64 Taumi, vijiboġa o nonori ma ami nota aiwai?”

Tau i anatapui i riwa, “Tauna ana ġo’apoapoe aubaina anina da ina iraġel!”

65 Ma ġelau i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

*Peter, Iesu i boviei*

*(Matthew 26:69-75; Luke 22:56-62; John 18:15-18, 25-27)*

66 Ma Peter au gabaura i mamae ma Pirisi ġeġetelarana ana taunola guguini i ġetai.

67 Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasaretei, ana tauvotaġotaġol!”

68 Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokorereko i tou‡].

---

† **14:61:** Isaiah i parivereta da *Keriso* ana au iraġe eġa ina gagaloana-melei. (Isa 53:7). ✨ **14:62:** Da 7:13 ‡ **14:68:** Wei riwana buka au wadubo nonoana eġa ita mamae.

<sup>69</sup> Taunola guguini, Peter i 'nanai ma i raukarena-melei ma rava au ġereġere i maimairi i riwei, “Wei ravana, tau tagogi!”

<sup>70</sup> Wate Peter i bovi me.

Mara aburuna muriai, tau au ġereġere i maimairi, Peter i riwana-melei, “Tam anina, tau tagogi; aubaina tam, Galiliei!”

<sup>71</sup> Ma Peter i riwa, “God au matana, tau a ririwa kaua, ravana o ririweia a vivinuanainei!”

<sup>72</sup> Maratagogi kokorereko i tou mara viruaina ma Peter, Iesu riwana i notai - *Muriai da kokorereko ina tou mara ruaġa, tam mara tonuġa ma bovieu.* Ma Peter i vinuabola kaua ma i tou.

## 15

*Iesu i taravaina-naiei Pilate au naona  
(Matthew 27:1-2, 11-19; Luke 23:1-5; John 18:28-38)*

<sup>1</sup> Ubaubandai boibogġi, pirisi babadai ma dogadogara ma tarawatu babadai anatapui i viboru\* ma i vianina da Iesu i pani ma i veredamanei Pilate au urana.

<sup>2</sup> Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.”

<sup>3</sup> Pirisi Babadai e viviwavuim kaua maġamaġgai aubai.

<sup>4</sup> Ma nanare Pilate, Iesu i vitaraviravirana-melei i pa, “Tam ma paribelana bo eġa? Ma nonori e viviwavuim kaua maġamaġgai aubai!”

---

\* **15:1:** Mrk 14:55 *Sanhedrin*

<sup>5</sup> Wate Iesu i genuana ma eġa ita paribelei. Ma Pilate i ba kauga.†

*Iesu ana iraġe i vianinei*

*(Matthew 27:15-38; Luke 23:13-25; John 18:39-19:16)*

<sup>6</sup> Tau i ai kauga maemaena da Raġona Torelana au marana, Pilate, panipani tagogi, rava ai ġoanei e ruperupeni ma e vovoterei da e nena.

<sup>7</sup> Orotu tagogi wavana Barabas; tauna Rome gabemani i viġaviei ma i pani da panipani au numana i mamae. Ana rava maiteni tauviraġena.

<sup>8</sup> Ma patara i ġeta da Pilate ita vibaġai da panipani tagogi ita rupeni Raġona Torelana au marana.

<sup>9-10</sup> Pilate i paribelei, “Taumi o ġoġoġei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

<sup>11</sup> Wate Pirisi Babadai, patara i egari da Pilate, Barabas ita rupeni ma eġa Iesu.

<sup>12</sup> Pilate, patara i paridadana-melei i pa, “Tauna o ġoreġoreia mai Jew ai gulau mena ana kauanei?”

<sup>13</sup> Tau i garara, “Ma tuparatui!”

<sup>14</sup> Pilate i riwa, “Aiwai apoapoena i kauei?” Ma tau i garara guratana, “Ma tuparatui!”

<sup>15</sup> Pilate i ġoġei da patara ita vinuaubai ma Barabas i rupeni ma sorodia i egari da Iesu i kwapui da i vitaratarai ma i naei da ita tuparatui.

*Sorodia, Iesu i vinamei*

*(Matthew 27:27-31; John 19:2-3)*

---

† **15:5:** Mai Rome ai tarawatu e mamae da maranai i viwawuim ma tauetara eġa uta paribelei lamna tam anina wavu ma varai.

16 *Sorodia*, Iesu i taravaina-ruiei Pilate ana au numa ma ai rava ḡelau i ḡoreiai.

17 Ma gara lebalebarina‡ [*me gulau ana gara*] Iesu i vioteni ma kunuteia ai donadonanei i viri da au kolana i terei.

18 Ma vinamana i raukarei ma i garara, “Egualau mai Jew ai gulau!”

19 Ma kolana gonuei i raviravi ma i ovaovai. Ma ae-tutuie i mae-ḡaira au doa ma i raudunelei ma i vivinamei.

20 Ma i vijiboḡa vorovei ma gara lebalebarina i voḡiḡi-tawanei ma ana gara i vioteni. Ma i taravaina-opunei da ita tuparatui.

*Iesu i tuparatui*

(*Matthew 27:32-44; Luke 23:26-43; John 19:17-37*)

21 Tau i nenaē ma Simon i nelaḡai, rava Sairinie§ (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai.

22 Tau i Iesu i naiei da gabu i ḡoreḡorei Golgotha, lamna anona unu gabuna.

23 *Sorodia*, *wine* bunama *myrrh* maiteni i virai ma Iesu i veredadani, wate tauna i geduaiei.

24 Ma Iesu i tuparatui ma ana gara, tau i ava au orai i ḡutai.\*

25 Ubaubana i 9 kilok nanare, Iesu i tuparatui.

26 Aniviwavuna i girumi ma i tutui, “Mai Jew ai gulau.”

27-28 ☆ Danedanenei ruaḡa, Iesu au ririvana

---

‡ 15:17: Eng. *purple*. § 15:21: Eng. *Cyrenian*. \* 15:24: Tau i ḡaima i tawanei me *dice* da aiai aiwai garana ita vaia. ☆ 15:27-28: Isa 53:12

i tuparatui; tagogi au oiena ma ġelauna au kelakelauna.†

<sup>29</sup> ✨Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuġa ma voa-melei.

<sup>30</sup> Ma vilawana-melem ma *korosiei* ma ġairai!”

<sup>31</sup> Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelau i vilawani, wate ainelana ita vilawana-melana-avei.

<sup>32</sup> Keriso Tauvilawana, Israel ana gulau; marina *korosiei* ma ġairai ma tana inanai da tana vitumaġaneil” Danedanenei i tupatuparatui maitenai, Iesu i vinamei.

*Iesu ana iragħe*

*(Matthew 27:45-56; Luke 23:44-49; John 19:28-30)*

<sup>33</sup> Ma au benai dobu anapuna i waguwarei da 3 kilok au bigai.

<sup>34</sup> Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*”

<sup>35</sup> Ma rava ġelau au ġereġere i maimairi i nonori ma i riwa, “Ona rautaniġaneil, Elijah e kwatukwatueil!”

<sup>36</sup> Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,‡ “Ona vipaipai ma tana inanai mepa da Elijah ina nei da ina tereġairei.”

<sup>37</sup> Ma Iesu ponana i rata ma i kwatu ma i lavutu tawanana.

---

† **15:27-28:** Giruma ġelau waduboi vs 28 e mamea *Ma aiwai i kaukaueia lamna peroveta i ririweia i tupua, Taii i nanai me taii ġo'apoapoe taukauei*. Isa 53:12 ✨ **15:29:** Mrk 14:58 ‡ **15:36:** Psa 69:21 peroveta i girumi da *Keriso* ita verei.



38 Ma Tempol au orana aniteregāgāra au pouna i wanasikai au tepana da i gāira au doa.

39 Ma *sorodia* ai bada, Iesu au naona i maimairi; i 'nanai da i lavutu tawanana ma i riwa, “Wei anina God Natuna.”

40 Waivine gēlalui aueia i mae ma i raraubiga: Mary Magdalene ma Mary (James keikeina ma Joses § aloi) ma Salome.

41 Taui, Iesu i votaḡotaḡoi ma i vovoagui maranai au Galili i mamae ma waivine gēlalui maḡamaḡau, tauna maiteni i gēgāe au Jerusalem, anatapui kampa.

*Iesu i vikokoagei*

(*Matthew 27:57-61; Luke 23:50-56; John 19:38-42*)

42-43 Ma au biga i tuturiai Joseph Arimathea\* tauna rava gāeḡaena tagogi boru gētelarana au orana. Tauna God ana vigulau ana nei i vipaipaiei. Ma vokaukua marana (Lamna Sabat au naona)† ma Joseph ana tepatorana, Pilate awarina i rui ma Iesu taubeuna i vibaḡei.

44 Pilate i baie i da Iesu boiboḡi i'raḡe. Tauna, *sorodia* ai bada i kwatuei ma i vitara-virevirei da Iesu i'raḡe bo eḡa?

---

§ 15:40: Au Mat 27:56, Matthew i girumi Joseph ma eḡa Joses.

\* 15:42-43: Eng. *Arimathea*. † 15:42-43: Mai Jew ai *Sabate*, madeḡa e neneulai au Friday e vivikarei da madeḡa e neneulai au Saturday e kwakwa. Mai Jew ai Tarawatu e ririwa da rava i 'raḡe lamna marana tagogina ina doboi. *Sabate* amadodo madeḡa e neneulai ina vikarei lamna aubaina Joseph i volaḡilaḡina da Iesu taubeuna ita doboi.

<sup>45</sup> Maranai *sorodia* ai bada i pariverei da ana riwa kaua. Ma Pilate, Joseph i riwei da Iesu tupuana i vaia.

<sup>46</sup> Joseph, gara maiana *gāeḡaena* i gimarai ma Iesu tupuana i tere-ḡairei. Gare i umai ma au guba tupuana i vimataveni ma *ḡaima gāeḡaena* i kaipeuri da kokoaga metaetana i viaitomeni.

<sup>47</sup> Mary Magdalene ma Mary - Joses alona i 'nanai mepa Iesu taubeuna i vimataveni.

## 16

### *Iesu i vomairi*

<sup>1</sup> Ma Sabat au murina, Mary Magdalene ma Mary - James keikeina alona ma Salome, bunama *ḡabuḡabui* i gimarai da i naiei da Iesu tupuana ita buloi.\*

<sup>2</sup> Ma Sunday ubaubanai boiboḡi maranai madeḡa i gogogo, tau i nae au kokoaga.

<sup>3</sup> Ma i nena ma i bababani, “Aiai aubaita *ḡaima* kokoaga au metaetana ina kaipeura-tawanei?”

<sup>4</sup> Maranai tau i taepai, i 'nanai da boiboḡi *ḡaima* i kaipeura-tawanei - *ḡaima gāeḡae* kaukauana.

<sup>5</sup> Maranai i rui au guba ma oroto laragana ana gara ararapoirina i 'nanai au oiena.† Ma tau orai i auepai.

<sup>6</sup> Orotu laragana i riwa, “Eḡa orami ina auepai, taumi, Iesu Nasaretei o baibaiei bo? I tupatuparatuia;

---

\* **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai ita votaḡotaḡoi. † **16:5:** Tupua i vimataveni au oiena i kiakiala, ana gara ararapoirina.

tauna i vomairi! Ona inana, tauna eġa weka! Taiu weka taubeuna i vimataveni.

<sup>7</sup> ✧ Marina ona nae ma ana tauvotaġotaġo ona riwei, ma Peter eġa nuanuami ina vuru da Iesu e vivinao au Galili. Kampa ona inana i ririwemi nanare.”

<sup>8</sup> Taiu i opu ma kokoagei i viruberubei ana ini sisi ma ana rovoi. Taiu i rovo kaua, lamna aubaina eġa rava ita riwei.

*Mark 16:9-20*

*Mark Riwana Aaimana damona lamna wariġa i vine-boai. Ma rava ġelauna aiwai i notanotai nanare au vs 9 da 20 i girumi. Wei damonana weka i vikarei.*

*Iesu, Mary Magdalene awarina i eġa*

<sup>9</sup> Iesu iraġelei i vomairi me au Sunday ubaubanai boiboġi ma i ainae da Mary Magdalene awarina i eġa. Maraotai Iesu, Mary awarina arua-apoapoei seven i viopuni.

<sup>10</sup> Iesu, ana tauvotaġotaġo i vivinuabola ma i toutou ma Mary i ġeta da i pariverei.

<sup>11</sup> Ma Mary i pariverei da Iesu i lawana me ma tauna matanei Iesu i 'nanai. Wate taiu eġa ita vitumaġanei.

*Iesu, tauvotaġotaġo ruaġa awari i eġa*

<sup>12</sup> Wei au murina Iesu inanana tapuna ma ana tauvotaġotaġo ruaġa awari i eġa; marana i taiu i nena au melagai.

<sup>13</sup> Taiu i naeme ma tauvotaġotaġo ġelau i vieġei. Wate taiu nanare eġa ita vitumaġanei.

*Iesu, Taiu 11 awari i eġa*

<sup>14</sup> Muriai tauī 11 i amam ma Iesu awarii i eġa. Ma i eni aubaina tauī orai i bado ma eġa ita vitumaġana maranai rava, i riwei da Tauna i vomairi me.

<sup>15</sup> ✧ Iesu ana Apasol i riwei, “Ona nae dobu au anatapuna. Ma God Riwana Aiaina ona jimei rava anatapui awarii.

<sup>16</sup> Aiai da i vitumaġana ma i babataito; tauna ina lawana. Ma aiai da eġa ita vitumaġana ina kovoġi.

<sup>17</sup> Ma tauī aiavoī da i vitumaġana, rewapana ina verei da kaua babai ina kauēi. Ma arua-apoapoei ina viopuni ma pona tapunei ina babani.

<sup>18</sup> Tauī, mota uraiei ina vaia ma waiawa ina umai ma eġa ina rauputei. Ma urai doridoriai au kolai ina terei ma ina lawana.”

*God, Iesu i ġaiei au Mara*

<sup>19</sup> ✧ BADA Iesu, awari i babani vorovei. Ma tauna i ġaiei au mara ma God au oiena i kiala.

<sup>20</sup> Tauvotaġotaġo i opu ma dobu au anatapuna i raraugugula. Ma BADA, tauī i voagui ma kaua babai i kaukauei da tauvotaġotaġo aiwai i bababaniei i vovai-virewapani.

**Wedau Mark**  
**The Gospel of Mark in the Wedau Language of Papua**  
**New Guinea**  
**Buk Mak long tokples Wedau long Niugini**

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

---

PDF generated using Haiola and XeLaTeX on 18 Apr 2025 from source files dated 31 Aug 2023

aa19f3e3-98fb-51fa-9c53-3906edc75f11